

ጳውሎሲ ቆሮንቶሴ አሳሰ ጸፊዳ ኮይሮ ኪታ ጊዶ ቆፋ

ጳውሎሲ ቆሮንቶሴ አሳሰ ጸፊዳ ኮይሮ ኪታይ ጸፊቲዳይ ኢዚ ካሴ ቆሮንቶሴን ኤሲዳ ዋሳ ኬላ ጊዶን ዲዛ አማኖን ዲሳ ጊሻሲኔ አማኖ ጊሻሰ ዴንዲዳ ሜቶታ ቢርሻናሰ ጊዲኮ። ሄ ዋዴ ቆሮንቶሴ ካታማያ ኩሜላ አላሜን ኤሬቲዳ ጊሪኬ አሳ ካታማ ጊደይሳፊካ ቦላራ አካያ ጌቲቲዛ ኦርሜ ካዎይ ሃሪዛ ዋና ካታማ። ሂና ሄ ካታማያ ኢዚን ዳር ጌታ ዛልኤይ ዛልኤቲዛሶ፤ ሃንኮ ዴሬ ዎጋ ባጋራ ጊዲኮ ዳር ዲቻ ቦላ ዳዉሲኔ ኢታ ሃኖኒኔ ዲማ ዲማ ሚሼ አማኖን ዳር ኤሬቲዳር።

ሃዋሬይ ሃራፔካ ሎኤሊ ጸሊዳይ ዋሳ ኬላይ ጊዶን ዲዛ ሻኬቲላ ጊሻሰ፤ ኢሰታ ኢታ ኦሶ ጊሻሰ፤ ላይማ ጊሻሲኔ ኤኮኔ ጌሎ ጊሻሰ፤ ዋሳ ኬላ ጊሻሰ፤ ጸሎ ኣያና ኢሞታታ ጊሻሲኔ ሃይቆፔ ዴንላ ጊሻሳ፤ ሄሳቶካ ሃዋሬይ ሚሺራቾ ቃላዛ ሃይታ ሃ ኦይሻታ ቦላ ኢሰታሰ ሎኤሊ ሚንሲ ዛር ኢሜሰ።

«ሲቆይ» ጸሲ ባ አሳሰ ኢሚዳ ኢሞታ ኡባሬ ኣጼሕ ጊዲዳይሳ ቆንጪሲዛይ ታማኔ ሄሻንሶ ሼሞፖይ ሃይሳ ሃ ማጻፋ ጊዶን ዳር ኤሬቲዳ ኪፊሌ ጊዲ ቆፔቲሰ።

ሃ ማጻፋይ ኦይኪዳ ኩሜላ ቆፋ

ጌሎሶ 1:1-9

አማኒዛይታ ጋርሳን ሜጴቲዳ ሻኬቲሕ 1:10—4:21

ኢታ ኦሶኔ ሶ አሳ ዲሰ 5:1—7:40

አማኒዛይታኔ አማኖንታ አሳ 8:1—11:1

አማኒዛይታ ዲሲኔ ጸሰ ጎይኖ ዎጋ 11:2—14:40

ሃይቆፔ ኪርሰቶሳ ዴንሊኔ አማኒዛይታ ዴንሕ 15:1-58

ዩሁዳን ዋዬ ቦላ ዲዛ አማኒዛይታ ማዳናሰ ኬሶ ሚሽ ሺሾ
16:1-4

ኩሻ ቆፋ 16:5-24

¹ ጸሳ ሼኔን ዬሱስ ኪርሰቶሳስ ኪቲታናሰ ጴይጌቲዳ ጳውሎሳፔኔ ኑ ኢሻ ሶስቲኔሴፔ፤

2 ቆርንቶሴን ዲዛ ጸሓፊ ዋሳኔ ከላሳ፡ ጎዳ ይሱስ ከርሰቶሳስ ዲማቲዳይታሲኔ ኢስታሳራ ኩሳራ ጎዳ ጊዲዳ ጎዳ ይሱስ ከርሰቶሳስ ሱንላ አዋንካ ጸይጊዛ አማኒዛይታራ ጊዳናስ ጸይጊቲዳ አሳ ኡባስ።

3 ኑ አዋ ጸሓፊኔ ጎዳ ይሱስ ከርሰቶሳፔ ኪያቴሌኔ ሳሮይ ኢንቴስ ጊዶ።

ጸሓፊ ጋላታ

4 ጎዳ ይሱስ ከርሰቶሳ ሳጋራ ኢንቴስ አማቲዳ ጸሓ ኪያቴላ ጊሻስ ኡባ ዋዴ ኢንቴ ጊሻሲካ ታኒ ጸሓ ጋላታይስ።

5 ጋሶይካ አይ ዮኦንካ፡ ሄሲካ ሃሳያን ጊዲን ኤራቴላ ኡባን ኢንቴ ዲሬቲዴታ።

6 ከርሰቶሳ ጊሻስ ኑ ኢንቴስ ማርካቲዳይሲ ኢንቴ አቻን ማኒዴስ።

7 ሄሳ ጊሻስ ኢንቴ ይሱስ ከርሰቶሲ ቆንጫና ጋላስ ናጊሺን አያና አምታታፔ አይኮይካ ኢንቴስ ፓጩና።

8 ጎዳ ይሱስ ከርሰቶሲ ናምኦንፊ ያና ጋላሳን ኢንቴ ኢንቴ ቦላ ቦሬይ ባይንዳ ቤታና ማላ ወርሴላ ጋካናስ ኢዚ ኢንቴና ሎኤላ ናጋና።

9 ኢዚ ባ ናዛ ኑ ጎዳ ይሱስ ከርሰቶሳ ኢሲፊቴላኮ ኢንቴና ጸይጊዳ ጸሲ ኢዚ አማኒቲዳ ጸሓ።

ዋሳኔ ማጽደቅ ሻኬቴላ

10 ታ አሻቶ! ኢንቴ ጋርሳን ሻኬቴላ ዶንታ ማላ ኢንቴስ ኢሲ ዋዚናይኔ ኢሲ ቆፋይ ዳና ማላኔ ኢንቴ ኢንቴ ጋርሳን ኢሲኖ ጊዳና ማላ ጎዳ ይሱስ ከርሰቶሳ ሱንላን ታ ኢንቴና ዋሳይስ።

11 ታ አሻቶ! ኢንቴ ጋርሳን ፓላማይ ዲዛይሳ ታ ቃሎኤ ሶ አሳፔ ሲያዲስ።

12 ዮኦዚካ ሃይሳ ማላ፤ ኢንቴ ጋርሳን ኢሲ ኢሲ አሳቲ፡ «ታ ጳውሎሳ ባጋ» ጌቲስ፤ ባጋይ ቃሴ፡ «ታ አጲሎሳ ባጋ» ጌቲስ፤ ባጋይ ቃሴ፡ «ታ ኬፋ ባጋ» ጊሺን ሃራይ ቃሴ፡ «ታ ከርሰቶሳ ባጋ» ጌቲስ። *

13 ሂሳቲኮ ከርሰቶሲ ሻኬቲ ዋዲዴ? ኢንቴ ጊሻስ ጳውሎሲ ካቂቲዴ? ዋይኮ ጳውሎሳ ሱንላን ጳማቂቲዴቲ?

14 ኢንቴ ጊዶፊ ቂሪስጳሳፔኔ ጋዪዮሳፔ አቲን ሃራ ኦናካ ታ ጳማቆንታ ጊሻስ ጸሓ ጋላታይስ።

* 1:12 ኬፋ ጉሲ ጴጽሮሳ ጉሳ።

1:12 ሃዋ 18:24

1:14 ሃዋ 18:8፤

19:29፤ ኦሮ 16:23

15 ሄሳ ገሻሰ ኦኒካ፥ «ታ ጳውሎሳ ሱንላን ጸማቂታዲስ» ጋና አሲ ዴና።

16 ቱሙካ ኢስተፋኖሴ ሶ አሳ ጸማቂዲስ፤ ሄይታፔ ሃራ ታ ጸማቂዳኮ ታ ኤሪዛዴይ ዴና።

17 ኪርሰቶሲ ታና ኪቲዳይ ሚሺራቾ ቃላ ዮታናሰ አቲን ጸማቂናሰ ጊዴና፤ ኪርሰቶሳ ማስቃሌይ ሃዳ ጊዶንታ ማላ ታኒ አሳፔ ጊዲዳ ጨንጫቴላን ሳባኪኬ።

ጸሳ ዋልቃኔ ኤራቴላ ጊዲዳ ኪርሰቶሳ

18 ማስቃሌዛ ኪታይ ጳያና ዲዛይታስ ኤያቴላ፤ ጊዶ አቲን አታና ዲዛ ኩሰ ጊዲኮ ጸሳ ዋልቃ።

19 «ጨንጫታ ጨንጫቴላ ታ ኢስታፌ ጳይሳና፤ ኤራንቻታ ኤራቴላ ታ ሃዳ ኦላና» ጌቴቲ ጌሻ ማጸፋን ጸፌቲዴሰ።

20 ጨንጫይ አዋን ዲዜ? ታማርዳ ኤራይ አዋን ዲዜ? ሃይሳ ዋዴዛ ፒልጊ ኤሪዛይ አዋን ዲዜ? ጸሲ ሃ አላሜዛ ኤራቴላ ኤያቴላ ኦሊቤኔ?

21 ጸሳ ኤራቴላፌ ዴንዲዳይሳን አላሜይ ባ ኤራቴላን ጸሰ ኤርይ ጸኒን ሳባኮ ኤያቴላን አማኒዛይታ አሻናሰ ጸሳ ሼኔ ጊዲዴሰ።

22 አይ ዋዴካ አይሁዳቲ ዲማ ማላታ ኮዬቴሰ፤ ጊሪኬ አሳቲ ቃሴ ኤራቴላ ኮዬቴሰ።

23 ኦኒ ጊዲኮ ካቂቲዳ ኪርሰቶሳ ሳባኮሰ፤ ሄሲካ አይሁዳታስ ጱዴ፤ አይዛቤታስ ቃሴ ኤያቴላ።

24 ጸሲ ጴይጊዳይታስ ኢስቲ አይሁዳታ ጊዲን ዋይኮ ጊሪኬ ዴሬ አሰ ጊዲኮካ ኪርሰቶሲ ጸሳ ዋልቃኔ ጸሳ ኤራቴላ።

25 ጋሶይካ አሳ ኤራፔ ጸሳ ኤያቴላ ኦዲዳ ኤራቴላ፤ አሳ ሚኖቴላፌ ጸሳ ላፋቴላ አዴሰ።

26 ታ ኢሻቶ! ካሴ ኢንቴ ጴይጌቲዛ ዋዴ ኢንቴ አይ ማላ አሳኮ አኔ ቆፒቴ፤ አሳ ቆፋ ማላ ጊዲኮ ኢንቴፌ ዳሪዛይቲ ኤራታ ጊዴኬታ። ኢንቴፌ ዳርቲ ዋልቃይ ባይንዳይታ፤ ዳርቲካ ጊታ ኬላ አሳፔ ዬላቴቤኬታ።

27 ጊዶ አቲን ጸሲ ኤራታ ዬላቻናሰ ዴራፔ ኤያታ ዶሪዴሰ፤ ጸሲ ሚኖታ ዬላቻናሰ አላሜዛፔ ዳቡራንቻታ ዶሪዴሰ።

28 ጸሲ ሃንኮ አማኖንታ አሳ አቻን ዴቴሰ ጌቴቲ ኤሬቲዛ ሚሻታ ባይንዳ ሚሻ ማላ ኦላና ሃይሳ አላሜዛን ለቁቲዳይታኔ ካዉዪዳይታ ላፋታ ዶሪዴሰ።

29 ሄሳካ ኢዚ ኦሊዳይ ኦኒካ ኢዛ ሲንላን ጨቄቶንታ ማላሳ።
 30 ኢንቴና ቃሴ ጸሲ ዬሱስ ኪርሰቶሳራ ኢሲፌቴሉ ዳና ማላ ኦሊዳሰ፤ ሄሳ ጊሻሰ ጸሲ ዬሱስ ኪርሰቶሳ ኦ ኤራቴሉ፤ ኦ ጸሊሎቴሉ፤ ኦ ጊሻቴሉ፤ ኦ ኣሺዛዴ ጊዳና ማላ ኦሊዳሰ።
 31 ሄሳ ጊሻሰ ካሴ ጌሻ ማጻፋን ጸፊቲዳ ማላ፤ «ጨቄቲዛ ኣሲ ጎዳን ጨቄቶ።»

2

ካቄቲዳ ኪርሰቶሳ ጊሻሰ ታማርሶ

1 ታ ኢሻቶ! ታ ኢንቴኮ ጸሳ ጹራ ቆንጨሳና ቢዳይ ታሰ ዶና ቃራቴሉ ዋይኮ ኤራ ዳርይ ዲዛ ጊሻሰ ጊዴና።
 2 ታ ኢንቴ ጊዶን ዲዛ ዋዴ ካቄቲዳ ዬሱስ ኪርሰቶሳፕ ኣቲን ሃራ ኤርንታ ማላ ታ ባጋራ ሙርታዲሰ።
 3 ታ ኢንቴኮ ዳር ዳቡራን፤ ያሻቴላኒኔ ዳር ኮኮራሼ ባዲሰ።
 4 ታ ቃላይኔ ሳባኮይካ ኣያና ዋልቃ ቆንጨሴላንፕ ኣቲን ጨዋኒኔ ኤራ ዳርን ጊዴና።
 5 ሄሲካ ኢንቴ ኣማኖይ ጸሳ ዋልቃንፕ ኣቲን ኣሳ ጨንጫቴላ ቦላ ጸጸንታ ማላ ሃኒዴሰ።

ጸሊሎ ኣያናፕ ኢሜቲዳ ኤራቴሉ

6 ኦ ካሃ ኩንሊዳ ኣሳታ ኣቻን ኤራ ሃሳያ ሃሳዮስ፤ ጊዶ ኣቲን ሃይሳ ሃ ኣላሜዛ ኤራቴሉ ጊዴና፤ ዋይኮ ጳያና ዲዛ ሃ ኣላሜዛ ሃሪዛይታ ኤራቴሉ ጊዴና።
 7 ጊዶ ኣቲን ኦ ሃሳይዛይ ካሴ ቆቴቲ ዲዛ ጸሳ ጹራ ኤራቴላ፤ ሄ ኤራቴላይ ጸሲ ዳር ዋዴፕ ካሴ ኦና ቦንቸሰ ካሴቲዲ ጊግሲ ዋሊዳይሳ።
 8 ሃ ኣላሜዛ ሃሪዛይታፕ ኦኒካ ሃ ኤራቴላ ኤሪቤና፤ ኤሪዳኮ ኢሰቲ ቦንቸ ጎዳ ካቄቴና።
 9 ጊዶ ኣቲን ጌሻ ማጻፋን፤
 «ኣሳ ኣይፌይ ቤኦንታዝ፤
 ኣሳ ሃይሊ ሲዮንታዝ፤
 ኣሳ ዋዚናይካ ቆፖንታዝ
 ጸሲ ባ ዶሲዛይታሰ
 ጊግሲዴሰ» ጌሰ።
 10 ጸሲ ጊዲኮ ሄሳ ባ ኣያና ባጋራ ኦሰ ቆንጨሲዴሰ፤ ኣያናይካ ጸሳሰ ዲዛ ጨማ ዮኦ ኣሾንታ ኡባ ፒልጊ ጸሊሰ።

11 እሳ ጋርሳን ኢዛዴስ ዲዛ አያናፔ ኣቲን ኢዛዴ ዋዚና ኤሪዛይ ኦኔ? ሃሳሶካ ጸሳ አያናፔ ኣቲን ጸሳ ቆፋ ኤሪዛይ ኦኒካ ዴና።

12 ጸሳፌ ኑስ ኢሜቲዳይሳ ኑኒ ኤራና ማላ ጸሳ አያናይ ኑስ ኢሜቲዴስ ኣቲን ኑኒ ሃይሳ ሃ አላሜዛ አያና ኤኪቤኮ።

13 ኑ ዮቲዛይ ሃይሳ፤ ኑኒ አሳፔ ታማርዳ ቃላ ጊዶንታ አያናፔ ታማርዳ ቃላ ሃሳዮስ፤ አያና ቱማቴላካ ኑ ቆንጨሲዛይ አያና ቃላና።

14 ጸሳ አያናይ ኢዛን ባይንዳ አሲ ጸሳ አያናፔ ጊዲዳዝ ኤካናስ ዳንዳዬና፤ ጋሶይካ ሃሳ ማላ ዮኦይ ኢዛስ ኤያቴላ፤ ኢዚ ባስ አያናን ፓጨቲዛዴ ጊዲዳ ጊሻስ ኢዚ ኤራናስ ዳንዳዬና።

15 ጸሳ አያናይ ኢዛን ዲዛዴይ ቃሴ ኡባካ ፓጨስ ኣቲን ባስ ኦናንካ ፓጨቴና።

16 ሄሲካ፡

«ኅዳ ቆፋ ኤራናስ

ዳንዳይዛይ ኦኔ?

ኢዛ ዘራናስ ዳንዳይዛይ ኦኔ?»

ጌቲቲ ካሴ ጌሻ ማጻፋን ጸፊቲዳ ማላ፤ ኑስ ጊዲኮ ኪርስቶሳ ዋዚናይ ዴስ።

3

ዋሳ ኬላ ጊዶን ሜዴቲዳ ሻኬቴላ

1 ታ አሻቶ! ታ ኢንቴና ኢንቴ ኪርስቶሳን ቡሮ ጉላ ናይታ ማላኔ ቡሮ አማኖይ ጌሎንታ አሳ ማላፔ ኣቲን አያናን ኩሚዳ አሳ ማላ ጋዳ ኢንቴስ ሃሳያናስ ዳንዳያቤኬ።

2 ኢንቴ ቡሮ ሚኖንታ ጊሻስ ታ ኢንቴና ማላ ፓሃዲስ ኣቲን ቡሮ ሚኖ ካላ ሚዛቤኬ፤ ሃኢካ ጊዲኮ ኢንቴ ቡሮኮ!

3 ኢንቴ ሃኢካ ቡሮ አማኖን ሚኖንታይታ ጊዲዳ ጊሻስ ኢንቴ ጊዶን ቃናቴቴሊኔ ፓላማይ ዴስ፤ ሂስቲን ኢንቴ ቡሮ አማኖን ሚኖንታ አሳ ማላ ጊዴኬቲ? ኢንቴ ኦሶይ ጮ ሜላ አሲ ኦሊዛይሳ ማላ ጊዴኔ?

4 ጋሶይካ ኢንቴ ጋርሳፌ ኢሶይ፡ «ታ ጳውሎሳሳ» ሃንኮይሲ ቃሴ፡ «ታ አጲሎሳሳ» ጊኮ ኢንቴ ጮ አሾ ቆፋን ጸላላ ዲዛ አሳ ማላ ጊዴኬቲ?

5 ኤር! ጊዶ ኣቲን አጲሎሲ ኣዜ? ጳውሎሲካ ኣዜ? ኢስቲ ኅዳይ ኢስታስ ኢሳስ ኢሳስ ኢሚዳ ማላ ኦሊዛ ኦሳንቻታ፤ ኢንቴካ ኢስታ ባጋራ አማኒዴታ።

6 ታ ቶካዲሰ፤ አጲሎሲ ሃሌ ኡሺዴሰ፤ ዲቺዲይ ጊዲኮ ጸሳ።

7 ሄሳ ጊሻሰ ዲቺዛይ ጸሰ ኣቲን ቶኪዛዴይካ፡ ሃሌ ኡሺዛዴይካ ኣይኮካ ጊዴቲና።

8 ቶኪዛዴ ጊዲን ወይኮ ኡሺዛዴ ጊዲን ኢሰቲ ኢሲኖ፤ ኢሰታፊ ኢሳዴይ ኢሳዴይ ባ ኦሶ ማላ ወይቶ ኤካና።

9 ጋሶይካ ኑ ጸሳራ ኢሲፊ ኦሊዛይታ፤ ኢንቴካ ጸሳ ጎሻ ጋዴኔ ጸሳ ኬላታ።

10 ጸሳፊ ታሰ ኢሜቲዳ ኢሞቴላ ገና ኬሌ ኬጺዛ ሂላ ማላ ኬላይ ኤቃናሰ ሎኤላ ገሊሳዲሰ፤ ኢዛ ቦላ ሃራ ኣሲ ኬላ ኬጸና፤ ጊዶ ኣቲን ኬላ ኬጺዛዴይ ዋሰቲ ኬጸናኮ ናጌታናሰ ቤሴሰ።

11 ጋሶይካ ኬላይ ኬጸቴላ ኦይኬቲዳፔ ጉዬ ሃራ ዋሊ ቃሴ ኬጸና ዳንዳይዛዴይ ኦኒካ ባ፤ ሄሲካ ኬላሰ ዮቻይ ዬሱሰ ኪርሰቶሳ።

12 ኦኒካ ኬላይ ኮይሮ ኬጸቲዳይሳ ቦላ ዋርቃን ወይኮ ቢራን ቦንቹቲዳ ሹቻን ወይኮ ሚላኒኔ ማታን ወይኮ ማቃን ኬጺኮ፤

13 ኢሳዴ ኢሳዴ ኦሶይ ኣይ ማላኮ ፒርዳ ጋላሰ ቆንጫና፤ ጋሶይካ ሄ ጋላሰ ኢሳዴ ኢሳዴ ኦሶይ ኣይ ማላኮ ታማን ፓጩቲ ኤሬታና።

14 ኦኒካ ኬጺዳ ኬሊ ሚኒ ኤቂዛ ጊዲኮ ሄሳዴይ ባ ወይቶ ኤካና።

15 ኢዛ ኦሶይ ጸጌቲዳዴይ ጊዲኮ ወይቶይ ኢዛሰ ዴናሺን ኢዛዴይ ባ ሁኤሰ ኣታና፤ ጊዶ ኣቲን ኢዛዴ ኣቴሊ ታማፔ ኣሲ ዋይዲ ኣቲዛ ኣቴላ ማላ ጊዳና።

16 ኢንቴ ኢንቴ ሁኤሰ ጸሳ ኬሌ ጊዲዳይሳኔ ጸሳ ኣያናይ ኢንቴ ጊዶን ዲዛይሳ ኤሬኬቲ?

17 ኦኒካ ጸሳ ኬሌ ላሊኮ ጸሲ ኢዛዴ ላላና፤ ጸሳ ኬሊ ጌሻ፤ ሄሲካ ኢንቴናኮ!

18 ኦኒካ ባርካ ባና ባሌሶፎ፤ ኢንቴፊ ኦኒካ ሃይሳ ሃ ኣላሜዛን ባና ኤራንቻ ማላ ቆፒኮ ኢዛዴይ ኤራንቻ ጊዳና ማላ ባና ባርካ ኤያ ማላ ቆዶ።

19 ሃይሳ ሃ ዴሬዛ ኤራቴሊ ጸሳ ኣቻን ኤያቴላ፤ ካሴ ጌሻ ማጸፋን፡ «ኢዚ ኤራንቻታ ኢሰታ ጌኔ ኦሶ ጋሶን ዛሪዲ ኦይካና» ጌቲቲ ጸፊቲዴሰ።

20 ቃሴካ ሃራሶን፡ «ኤራንቻታ ቆፋይ ሃዳ ጊዲዳይሳ ጎዳይ ኤሬሰ» ጌቲቲ ጸፊቲዴሰ።

21 ሄሳ ጊሻሰ ወሪካ አንቴሰ ጊዲዳ ጊሻሰ ኦኒካ አሳን ጩቄቶ።

22 ጳውሎስ ጊዲን፣ አጲሎስ ጊዲን፣ ዋይኮ ከፋ ጊዲን፣ አላሜ ጊዲን፣ ዴኦ ጊዲን፣ ዋይኮ ሃይቆ ጊዲን፣ ሃኢ ዲዛዝ ጊዲን፣ ዋይኮ ቡሮ ያና ሚሽ ጊዲን፣ ወሪካ አንቴሳ።

23 አንቴካ ከርሰቶሳይታ፤ ከርሰቶሲካ ጸሳይሳ።

4

ከርሰቶሳ ሃዋሬታ

1 ሄሳ ጊዲዳ ጊሻሰ አሲ ወሪካ ኑና ከርሰቶሳ አሳንቻታ ማላኔ ጸሳ ጹራ ቆንጩሳናሰ ሃዳራ ኤኪዳ አሳ ማላ ቆዳናሰ ቤሴሰ።

2 ሃዳራ ኤኪዳይቲካ አማኔቲዳይታ ጊዳናሰ ቤሴሰ።

3 ታ ቦላ አንቴ ፒርዲንካ ዋይኮ ዱላታ አሳይ ፒርዲንካ ታ ባጋራ ታሰ አይኮይ ባ፤ ሃራይ አቶሺን ታርካ ታ ቦላ ፒርዲኬ።

4 «ታ ኤሪዛ ማላ ታኒ ታ ዋዚናራ ሲጴዛ ሚሽ ባ፤ ጊዶ አቲን ሄሳ ጉሲ ታ ቦላ ዋሮይ ባ» ጉሰ ጊዳና። ቡሮ ታ ቦላ ፒርዳናይ ጎዳ።

5 ሄሳ ጊሻሰ ፒርዳና ዋይይ ጋኮንታ ሃራ አይ ዮኦካ ፒርዶፍቲ፤ ጎዳይ ያና ጋካናሰ ናጊቲ፤ ኢዚ ጴማ ጊዶን ቆቲቲዳይሳ ቡሮ ቆንጩ ኬሳና። አሳ ዋዚና ጊዶን ዲዛ ቆፋካ ቆንጩ ኬሳና፤ ሄ ዋዴ ኢሲ ኢሲ አሲ ባሰ ቤሲዛ ጋላታ ጸሳ አቻፌ ኤካና።

6 ሄሳ ጊሻሰ ታ አሻቶ! ታ አንቴና ጎኣና ማላ ሃ ዮኦዛን ታናኔ አጲሎስ አንቴሰ ለሚሶ ሺሻዲሰ፤ ታ ሃይሳ ኦሊዳይ፣ «ጸፊቲዳይሳፊ አጵፋ» ጊዛይሳ አንቴ ኑፔ ታማራና ማላሳ። ሄሳ ጊሻሰ አንቴ ኢሳዴ ሳቢዲ ሃራ አሰ ካፋናሰ ቤሴና።

7 ኔኒ አዛን አቆይ? ኔኒ ሃራፔ ኤኮንታ አቲዳ ሚሽ አዜ? ሂሰቲን ኔ ወርሳካ ኤኪዳይ ሃራ አሳፔ ጊዲኮ ሃራ አሳፔ ኤኮንታ አሳ ማላ አዛሰ ጩቄታይ?

8 ሃኢ ጊዲኮ አንቴሰ ኮሺዛዝ አንቴ ኡባ ዴሚዳታኔ ዱሬቲዳታ፤ ኑፔካ ሻኬቲዲ ካዋቲዳታ፤ አንቴ ቱሙካ ካዋቲዳኮ ኦኒካ አንቴናራ ካዋታናኮ ሺን።

9 ጋሶይካ ጸሲ ኑና ሃዋሬታ ኑ ቦላ ሃይቆ ፒርዳይ ፒርዳቲዳ አሳታ ማላ አሳ ኡባፌ ወርሴሰ ኦሊዳዝ ታሰ ሚሳቲሰ፤ ሄሳ ጊሻሰ አላሜሰ፤ ከታንቻታሲኔ አሳ ኡባሰ ካሳ ሚሽ ጊዲዶሰ።

10 ኑ ከርሰቶሳ ጊሻሰ ኤያታ ጊዲዶሰ፤ አንቴ ቃሴ ከርሰቶሳን ኤራንቻታ፤ ኑኒ ዳቡራንቻታ፤ አንቴ ጊዲኮ ሚናታ፤ አንቴ ቦንቹቲዳይታ፤ ኑኒ ጊዲኮ ካወሻታ።

11 ሃኖ ጋካናሰ ኑ ጋፎሰ፤ ሳሜቶሰ፤ ካሎቶሰ፤ ቡኬቶሰ፤ አቂዛሶይ ጳጴን ዋዬቶሰ።

12 ኑ ኩሼራ ኦሊ ዳቡሪ አቆሰ፤ ኑና ቃንጊሺን ኑ ቃሴ አንጀሰ፤ ኑና ጎዲሺን ኑ ዳንዳዮሰ።

13 ኑ ሱንሐ ኢሰቲ ሞሪሺን ኑ ቃሴ ሎኦ ዛሮሰ፤ ሃኖ ጋካናሰ ኑኒ ቢታፌ ፒቴቲዳ ቡራ ገዲዶሰ።

14 ታ ሃይሳ አንቴሰ ጸፊዛይ አንቴና ታ ዶሲዛ ታ ናይታ ማላ ዘራናሰ ጋዳ ኣቲን አንቴና ዬላቻናሰ ገዴና።

15 አንቴና ኪርሰቶሳን ዲቺዛ ዳሮ ኣሳቲ ዲኮካ አንቴሰ ዳሮ ኣዋቲ ዴቴና፤ ታኒ ቃሴ ዬሱሰ ኪርሰቶሳ ሚሺራቾ ቃላን አንቴና ዬላዲሰ።

16 ሄሳ ገሻሰ አንቴ ታና ሚሳታና ማላ ታ አንቴና ዋሳይሰ።

17 ጎዳን ዳሮ ዶሴቲዳይሳኔ አማኔቲዳ ታ ና ጸምቶሳ ታ አንቴኮ ከቲዳይ ሄሳ ጋሶና። ኢዚካ ዲማ ዲማሶን ዲዛ ዋሳ ኬላ ኣሳ ወርሲ ታ ታማርሲዳ ቲሚርቴዛራ ጋጊዛይሳ ዬሱሰ ኪርሰቶሳን ዲዛ ዴኦ ኦጌ ገሻሰ አንቴና ኢዚ ቆፍሳና።

18 አንቴፌ ኢሲ ኢሲ ኣሳቲ ታ ናምኣንሶ አንቴና ቤያናሰ ቦንታዝ ኢሰታሰ ሚሳቲን ኦቶሬቲዳ።

19 ገዶ ኣቲን ጎዳ ሼኔ ገዲኮ ማታራ ታ አንቴኮ ባና፤ ሄ ባዳ ሄ ኦቶራንቻቲ ሃሳይዛዝ ጸላላ ገደንታ ኢሰታሰ ኣዛ ዋልቃይ ዲዛኮ ቤያና ኮያይሰ።

20 ጋሶይካ ጸሳ ካዋቴሊ ጮ ዶና ጸላላ ገደንታ ዶናፔ ቦላራ ጸሳ ዋልቃ።

21 ኤሮ! አንቴ ኮይዛይ ኣዋይሴ? ዱርቃ ኤካ ቦዬ? ዋይኮ ሲቆራኔ ኣሸኬቴላ ኣያናራ ቦዬ?

5

ዋሳ ኬላን ኦሴቲዳ ዬላቺዛ ናጋራ

1 አንቴ ጋርሳን ዬላቺዛ ላይማይ ዲዛይሲ ዋሬቴሰ፤ ሄሳ ማላ ቲናቴሊ ኣማኖንታ ዴሬታ ኣቻንካ ዴና፤ ባ ኣዋ ማቾ ኤኪዳ ኣሲ አንቴኮን ዴሰ።

2 ሂሰቲን ሄሳ ማላ ዬላቺዛ ሚሺ አንቴ ገደን ዲሺን ኣዛሰ ኦቶሬቲቲ? ሄሳፌ ሄ ዮኦዛን አንቴ ሙዞታናሰ አንቴሰ ቤሴኔ? ሄሳ ማላ ኦሊዳዴ አንቴ ጋርሳፌ ዲጊቴ።

3 ታ ኢንቴናራ አሾን ኢሲፌ ዶንታ ኣጊኮካ ኣያናን ቃሴ ኢንቴናራ ዳይሰ፤ ታ ሃኢ ኢንቴናራ ዲዛ ማላ ሄሳ ኦሊዳዴ ቦላ ፒርዳዲሰ።

4-5 ኢንቴ ሸቂዛሶን ታ ኢንቴናራ ዲዛ ጊሻሰ ጎዳ ዬሱሳ ሱንፋኒኔ ኢንቴ ጊዶን ዲዛ ኦ ጎዳ ዬሱሳ ዋልቃን ሄ ሞራንቻዛ ኣሾይ ቋዪን ኢዛ ሸምፖይ ጎዳ ጋላሳን ኣታና ማላ ሄሳ ማላ ኣሲ ጸላኤሰ ኣጲ ኢሜቶ።

6 ኢንቴ ጨቁቲዛይሲ ሎኦስ ጊዴና፤ ጉላ ኢርሾይ ዳሮ ቡኬሶ ዴንፊሊዛ ኤሬኬቲ?

7 ኢንቴ ሃኢ ኢርሾይ ባይንዳ ኦራላ ቡኬሶ ጊዳና ማላ ካሴ ጫላ ኢርሾዛ ኢንቴ ጊዶፌ ዲጊቴ፤ ኦ ፓዚጋ ዶርሰ ጊዲዳ ከርሰቶሲ ኦስ ያርሼቲዴሰ። *

8 ሄሳ ጊሻሰ ኣኔ ኦኒ ፓዚጋ ባኣሌዛ ቆሆይኔ ኢታቴሊ ኢዛን ኩሚዳ ካሴ ጫላ ኢርሾ ቦላ ጊዶንታ ኢርሾይ ባይንዳ ኡኬላን ሱሬቴላኒኔ ቱማን ቦንቾሰ።

9 ኢንቴሰ ላይማቲዛ ኣሳታራ ኢሲፌቴሊ ዶንታ ማላ ታ ኢንቴሰ ካሴ ዳብዳቤ ጸፋዲሰኮሺን።

10-11 ኢንቴ ኣማኖሰ ጊሼ ላይማቲዛ ኣሳራ ጊዶንታ ዋይኮ ጮ ጋጺጋጺዛይታራ፥ ካይሶቲዛይታራ፥ ኤቃሰ ጎይኒዛይታራ ጋጎፍቴ ጉሰ ጊዶንታ ዲሺን ሃኢ ታ ጸፊዳይ ኣማኖይሰ ጊሼ ላይማቲዛይታራ ዋይኮ ማሶቲዛይታራ፥ ጋጺጋጺዛይታራ፥ ኤቃሰ ጎይኒዛይታራ፥ ኣሳ ሱንፊ ሞሪዛይታራ ዋይኮ ጫጺዛይታራ፥ ኣሳ ሚሽ ቦንቂዛዴንታራ ኢንቴሰ ኢሲፌቴሊ ዶፖ፤ ሄይታንታ ማላራ ሃራይ ኣቶሺን ካሊካ ኢሲፌ ሞፒቴ።

12 ሃንኮ ኣማኖንታ ኣሳ ቦላ ፒርዳናሰ ታና ኣዚ ጋሊዜ? ዋሳ ኬላን ዲዛይታ ቦላ ኢንቴ ፒርዴኬቲ?

13 ዋሳ ኬላፌ ካሬራ ዲዛይታ ቦላ ጊዲኮ ጸሲ ፒርዳና፥ «ኢንቴ ኢንቴ ጊዶፌ ኢታ ኣሰ ዲጊቴ» ጌቴቲ ጌሻ ማጸፋን ጸፊቲዴሰ።

6

ኣማኒዛይታ ጋርሳን ዴንዲዳ ሞቶ

5:6 ጋላ 5:9 * 5:7 ፓዚጋ ቦንቹዛ ዋዴ ኣሳይ ጫላ ኢርሾ ጊዲዳ ሚሽ ካላን ዬጌና። 5:7 ኬሳ 12:5 5:8 ኬሳ 13:7፤ ዛሬ 16:3

1 አንቲ ጋርሳፌ ኢሳዴስ ሃራ አማኒዛዴራ ዮኦይ ዲኮ ሄ ዮኦዛ አማኒዛይታ አቶ ሺሻናይሳ ዋስቲ አማኖንታ አሳ ሲንፋን ፒርዴታና ሺሺዜ?

2 አማኒዛ አሳይ አማኖንታ አሳ ቦላ ፒርዳናይሳ አንቲ ኤሬኬቲ? አንቲ ቡሮ አላሜ ቦላ ፒርዳናይታ፤ ጊዲኮካ ሄሳ ጉላ ዮኦ ቦላ ፒርዳናሰ ዳንዳዬኬቲ?

3 ሃይሳ ቢታ ቦላ ዲዛ ፒርዳይ አቶሺን አንቲ ቡሮ ኪታንቻታ ቦላ ፒርዳናይሳ ኤሬኬቲ?

4 አንቲ አንቲ ጋርሳን ኦዬቲኮ አማኒዛይታ ማባራፔ ካሬን ዲዛይታኒኔ ካዴቲዳ አሳታ ሲንፋን ዋስቲ አንቲ ዮኦ ሺሺቲ?

5 ታ ሄሳ አንቲሰ ጊዛይ አንቲና ዬላቻናሳ፤ አንቲ ጋርሳን አማኒዛይታ ጊሲሳናሰ ዳንዳይዛ ዋዚናማ አሲ ዴኔ?

6 ጊዶ አቲን አማኒዛዴይ ሃራ አማኒዛዴ ዋታናሰ አላሜ ፒርዳ ኬፊ ባናሰ ቤሲዜ?

7 አንቲ ጋርሳን ኢሶይ ኢሳ ዋቶይ አንቲ ኩንዴሳሰ ማላታ ቤሲሰ። አንቲ ቆሃናፔ ቆሃቲኮ ሎኤኔ? ቃሴካ አንቲ አሰ ባሌላናፔ አንቲና አሲ ባሌሊኮ ሎኤኔ?

8 አንቲ ሃ ቆሃታናፔ ጌዴ ቆሃታኔ ባሌሊታ፤ ሄሲካ አንቲ አሻታ፡

9 ማካላንቻቲ ጸሳ ካዋቴል ጌሎንታይሳ ኤሬኬቲ? ሄሳ ማላ ዮኦን ባሌቶፍቲ። ላይማታና ቃቃቲዛይቲ፡ ኤቃ ኤቁዛይቲኔ አዴይ አዴራ ላይማቲዛይቲ፡

10 ዋይኮ ካይሶቲ፡ ጋጺጋጺዛይቲ፡ ማሶቲዛይቲ፡ አሰ ጫዪዛይቲኔ ቦንቁዛይቲ ጸሳ ካዋቴል ላቴቲና።

11 አንቲፌ ኢሲ ኢሲ አሳቲ ሄይታንታ ማላ ሺን ሃኢ ቃሴ ጎዳ ዬሱሰ ኪርሰቶሳ ሱንፋኒኔ ኑ ጸሳ አያናን ሜጨቲዴታ፤ ዲማቲዴታኔ ጸሊዴታ።

ባ አሳቴፋን ጸሳ ቦንቾ

12 ሃራይ ወሪካ ታሰ አሜቲዴሰ፤ ጊዶ አቲን ወሪካ ጎኢዛዝ ጊዴና። ወሪካ ታሰ አሜቲዴሰ ጊዶ አቲን አይ ሚሺካ ታና ሃራና።

13 ቃሴ ካሊ ኡሎሳ፤ ኡሎይካ ካላሳ፤ ጊዶ አቲን ጸሲ ናምአካ ቆይሳና፤ አሳቴሊ ጎዳሳፌ አቲን ላይማሰ ጊዴና፤ ጎዳይካ አሳቴላሳ።

14 ጸሲ ጎዳ ሃይቆፔ ዴንሊዳ ማላ ኦናካ ቃሴ ኢዚ ባ ዋልቃን ሃይቆፔ ዴንፋና።

15 እንቲ ኣሳቲላይ ከርሰቶሳ ኣሳቲላ ቢሊቲ ጊዲዳይሳ እንቲ ኤሬኬቲ? ሂሰቲን ታ ከርሰቶሳ ኣሳቲላፌ ኢሳ ላይማን ኣቁዛ ኣሳታራ ኢሲኖ ሂሰቶ? ሙሌካ ቤሴና።

16 ዋይኮ ላይማቲዛሪራ ኣቁዛዳይ ኢዚራ ኢሲ ኣሾ ጊዲዳይሳ እንቲ ኤሬኬቲ? «ናምኣይ ኢሲ ኣሾ ጊዳቴሰ» ጌቲቲዳሰ።

17 ጊዶ ኣቲን ጎዳራ ኢሲኖ ጊዲዳይሳ ኢዛራ ኢሲ ኣያና ጊዳሰ።

18 ላይማፔ ሃኪቲ፤ ኣሲ ኦሊዛ ሃራ ናጋራይ ወሪ ኢዛዳ ኣሾፔ ካሬራ ሃኔሰ፤ ላይማ ላይማቲዛዳይ ጊዲኮ ባርካ ባ ኣሳቲላ ቦላ ናጋራ ኦሌሰ።

19 እንቲ ኣሳቲላይ እንቲ ጋላን ዲዛ ጸሎ ኣያናሰ ዲሳሶ ጊዲዳይሳ እንቲ ኤሬኬቲ? ሄ ኣያናይካ እንቲ ጸሳፌ ኤኪዳይሳ፤ እንቲካ እንቲሰ ጊዳኬታ።

20 እንቲ ሚሻን ሻሜቲዳታ፤ ሄሳ ጊሻሰ እንቲ እንቲ ኣሳቲላን ጸሰ ቦንቺቲ።

7

ኤኮ ጊሻሲኔ ጌሎ ጊሻሰ ሺቂዳ ኦይሾኔ ዛሮ

1-2 እንቲ ታሰ ጸፊዳ ማላ ኣሲ ማጫሳኮ ጋኮንታ ኣጊዛኮ ሎኦኮ! ጊዶ ኣቲን ላይማፔ ናጌታናሰ ኣቲማሳሰ ኢሳሰ ኢሳሰ ማቻ ዲ። ማጫሳሰካ ኢሲኔይሰ ኢሲኔይሰ ኣዚናይ ዶ።

3 ኣዚናይ ባ ማቺይሰ ኮሺዛዝ ኡባ ኦሶ፤ ማቻካ ባ ኣዚናሰ ኮሺዛዝ ወርሳ ኦሶ።

4 ማቺ ኣሳቲሊ ኢዚሰ ጸላላ ጊዶንታ ኣዚናሳራ ኮላ፤ ሄሳሶካ ኣዚና ኣሳቲሊ ኢዛሰ ጸላላ ጊዶንታ ማቺይሳራ ኮላ።

5 ናምኣይ ዶሳን ዋሳሰ ጊዲ ዘሬን ጊዶ ጊዲ ቃቺዳ ጋላሳቲ ኣቲን ሃራ ጋላሰ ኢሶይ ኢሳሰ ኣካይ ጎፔቶ፤ ሄሳ ጋሶን እንቲሰ እንቲና ሃሮይ ጸኒን ጸላኤይ እንቲና ፓጮንታ ማላ ናምኣይ ኢሲፌ ኣቁቲ።

6 ታ ሄሳ ጊዛይ ጮ ኣዛዞ ማላ ጊዶንታ ዘሬ ዘራይሰ።

7 ኣሲ ወሪ ታ ማላ ማቺ ኤኮንታ ዲዛኮ ታ ዶሳይሰ፤ ጊዶ ኣቲን ኢሲ ኢሲ ኣሳሰ ጸሳፌ ኢሜቲዳ ዲማ ዲማ ኢሞታይ ዳሰ፤ ኢሳሰ ኢሲ ቆሞ ኢሞታይ ዳሰ፤ ሃንኮይሳሰ ቃሴ ሃራ ቆሞ ኢሞታይ ዳሰ።

8 ቡሮ ኤኮንታይታኔ ጌሎንታይታ ጊሻሰ ቃሴካ አዚናይ ሃይቂዳ ማጫሳታ ጊሻሰ ታ ጊዛይ ኢሰቲ ጌሎንታኔ ኤኮንታ ታ ማላ ዲዛኮ ኢሰታሰ ሎኦ ጋይሰ።

9 ጊዳ ኣቲን ኢሰቲ ባና ናጋናሰ ዳንዳዮንታይታ ጊዲኮ ጌሌቶኔ ኤኬቶ፤ ጮ ኣሞን ጸጌታናፔ ኤኮይኔ ጌሎይ ሎኦ።

10 ኤኪዳይታሲኔ ጌሊዳይታሰ ታ አሚዛ ኣዛዞይ ሃይሳ፤ ሄሲካ ጎዳ ኣዛዞፔ ኣቲን ታ ኣዛዞ ጊዴና፤ ኣዚና ጌሊዳ ማጫሳያ ባ ኣዚናፔ ሻኬቱፋ።

11 ሻኬቲዛ ጊዲኮ ሃራ ኣዚና ጌሎንታ ኡቱ፤ ኣካይ ጊኮ ባ ኣዚናራ ጊጉ፤ ኣዚናይካ ባ ማቾ ኣንጂ ዬዶፎ።

12 ሃንኮ አሳሰ ቃሴ ታ ሂዘጋይሰ፤ ሄሳ ጊዛይካ ታና ኣቲን ጎዳ ጊዴና፤ አማኖንታ ማቾ ዲዛ አማኒዛዴይ ማቼያ ኢዛራ ዳና ዶሲኮ ኢዚ ኢዛ ኣንጂ ዬዳናሰ ቤሴና።

13 አማኖንታ ኣዚናይ ዲዛ አማኒዛ ማጫሳያ ሄ አማኖንታ ኣዚናይ ኢዚራ ዳናሰ ኮይኮ ኢዛ ኢዛፔ ኣንጂታ ባናሰ ቤሴና።

14 ጋሶይካ አማኖንታ ኣዚናይ አማኒዛ ባ ማቼዪን ኣንጂቲሰ፤ አማኖንታ ማጫሳያካ አማኒዛ ባ ኣዚናን ኣንጂታዉሰ፤ ሄሳሉ ሃኖንታ ኣጊኮ ኢንቴ ዬሊዳ ናይቲ ቱናታ ጊዳናሺን ሃኢ ቃሴ ኣንጂቲዳይታ።

15 ጊዳ ኣቲን ናሞኣታፔ ኢሶይ አማኖንታዴይ ሻኬታና ኮይኮ ሻኬቶ፤ ኣዴ ጊዲን ማጫ ጊዲን አማኒዛዴይ ሄሳ ማላ ዋጋን ቃሼቴና፤ ጸሲ ኑና ሳሮን ዳና ማላ ጸይጊዴሰ።

16 ሃኔ ኔኒ ኔ ኣዚና አሻናኮ ኣይ ኤራይ? ዋይኮ ሃይሶ ኔኒ ኔ ማቾ አሻናኮ ኣይ ኤራይ?

17 ጮ ኢሲ ኢሲ ኣሲ ጸሲ ጸይጊዳ ማላኔ ጎዳይ ዋሊዳ ማላ ዴኦ፤ ዋሳ ኬላታሰ ታ ዋሊዛ ዋጋይ ሄሳ።

18 ኢሳዴይ አማናናፔ ካሴ ቃጸሬቲዳ ጊዲኮ ቃጸሬቶንታ ኣሳ ማላ ሃኖ። ቃሴ ቃጸሬቶንታ ዲሼ አማኒዳዴይካ ቃጸሬቶፎ።

19 ቃጸሬቲን ቃጸሬቶንታ ኣጊን ናሞኣንካ ጎኣይ ዴና፤ ዋና ኣይፌ ዮኦይ ጸሳ ኣዛዞ ፖሎ።

20 ኢሲ ኢሲ ኣሲ ባ ጸይጌቲዳ ጸይጌቲላን ሚኒ ዴኦ።

21-22 አማኒዛ ዋዴ ኔ ኣይሌ? ኔ ሄሳሰ ዳሮ ሜቶቶፓ፤ ዋዜታና ዳንዳይኮ ዋዜታ፤ ጋሶይካ ኣይሌ ጊዲ ዲሼ ጎዳ አማኒዳዴይ ኢዚ ጎዳ ጎቃ፤ ሄሳሉካ አማኒዛ ዋዴ ጎቃ ጊዲዳዴይ ኢዚ ኪርሰቶሳሰ ኣይሌ።

23 ኢንቴ ሚሻን ሻሜቲዴታ፤ ሄሳ ጊሻሰ ኣሳ ኣይሌ ጊዶፒቴ።

24 ታ አሻቶ! አንቴፌ ኢሲ ኢሲ አሲ ባ ጾይጌቲዳ ማላ ጸሳራ ሚኒ ዳኦ።

ጌላኦታ፡ ፓንፋታኔ አምኤታ ጊሻሰ ሸቂዳ ኦይቮ

25 ጌላኦታኔ ፓንፋታ ጊሻሰ ታሰ ጎዳፔ አሜቲዳ አዛዘይ ዴና፤ ጊዶ አቲን ጎዳ ማርቴላፌ ዴንዲዳይሳን ታ አንቴሰ አማኔቲዳዴ ጊዳዳ አንቴና ዘራይሰ።

26 ሃይሳ ሃኢ ዋዴ ሜቶ ጋሶን አንቴ ሃኢ ዲዛ ማላ ዲዛኮ ታሰ ሎኦ ሚሳቴሰ።

27 ኔ ማቾ ኤኪዳዴ ጊዲኮ አንጃ ዬዳናሰ ኮዮፓ፤ ማቾ ኤኮንታዴ ጊዲኮ ማቾ ኤካናሰ ኮዮፓ።

28 ማቾ ኤኪኮካ ናጋራ ጊዴና። ጌላኦያካ ጌሊኮ ናጋራ ጊዴና፤ ጊዶ አቲን ኤኪዛ አሳታኔ ጌሊዛይታ ቦላ ሃይሳ አላሜዛን ኢሰታ ዳሮ ሜቶይ ጋካና፤ ታ ቃሴ ሄሲ አንቴ ቦላ ጋኮንታ አጋናይሳ ደሳይሰ።

29 ታ አሻቶ! ታ ቆፋይ ሃይሳ ማላ፤ ዋዴዚ ቃንሐ ጊዲዳ ጊሻሰ ማቾ ዲዛዳይ ማቾ ባይንዳዴ ማላ ዳኦ።

30 ዬኪዛይቲ ዬኮንታ አሳ ማላ፤ ኡፋዬቲዛይቲ ኡፋዬቶንታ አሳ ማላ ጊዴቶ፤ ሚሼ ሻሚዳዴንቲ ሻሜቲዳ ሚሻ ባሰ ጊ ቆፖፌቶ።

31 ሃይሳ አላሜዛ ሚሻን ጎኤቲዛይቲ ኡባይ ጎኤቶንታ አሳ ማላ ጊዲ ዴቶ። ጋሶይካ ሃይሳ አላሜዛ ሃኖይ ኦፋናሰ ዴሰ።

32 አንቴ ሂርጋይ ባይንዳ ዳና ማላ ታ ኮያይሰ፤ ማቾንታዴይ ጎዳ ኡፋይሳናሰ ጎዳ ጊሻሰ ቆፔሰ።

33 ማቾዳዴይ ቃሴ ባ ማቾዮ ኡፋይሳናሰ ሃይሳ አላሜዛ ሚሽ ቆፔሰ።

34 ሃይሳን ኢዛ ቆፋይ ናምኤ ኬዚ ሻኬቴሰ፤ ጌሎንታ ማጫሳያ ዋይኮ ጌላኦያ ጎዳዝ ጸላ ቆፓዉሰ፤ ኢዚሰ ጌታ ቆፋይካ አሾንካ፤ አያናንካ ጎዳሰ ዲማቴላ፤ ጌሊዳራ ጊዲኮ ባ አዚና ኡፋይሳናሰ ሃይሳ አላሜዛ ሃኖ ጸላ ቆፓዉሰ።

35 ታ ሄሳ ጊዛይ አንቴሰ ሎኦናዝ ቆፓዳፔ አቲን አንቴና ዳሮ ቆፋን ዬጋናሰ ጊዴና፤ ታሰ ዲዛ ጌታ ቆፋይ አንቴ ዋዚናይ ሻኬቲ ናምኤ ኬዘንታ አንቴ ጎዳን ሚኒዲ ዋጋራ ዴኦናሳ።

36 ኢሳዴይ ባ ኦይቹዳ ጌላኦዮ ዋጋራ ኦይኮንታ ኣጌኮ ኢዚ ዋዴይካ ጨሚ ጨሚ ቢኮ ኤካና ኮይኮ ባ ኮዬዳ ማላ ኤኮ፤ ኤኪኮኔ ጌሊኮ ሎኦ፤ ናጋራ ጊዴና።

37 ጊዶ አቲን ሃይሳ ሃ ዮኦዛን ኢዛ ዋዚናይ ቃጸንታ ባና ሃሪዲ ጌላኦዮ ኤኪኮ ጊዲ ሙርቲዳ አሲ ሎኦ ኦላዴሰ።

38 ሄሳ ጊሻስ ጌላኦኖ ኤኪዳዴይ ሎኦ ኦሊዴስ፤ ኤኮንታዴይካ አጼዓ ሎኦ ኦሊዴስ።

39 ኢሲ ማጫሲ አዚናይ ፓጸ ዲዛ ዎዴ ኩሜላን ባ አዚናራ ቃሼታዲስ፤ አዚናዚ ሃይቂኮ ባ ኮዪዳ አሰ ጌላና ዳንዳያወሰ፤ ኢዛ ጌላናዴይ አማኒዛዴ ጊዶ አቲን ጌሉ።

40 ታ ቆፋ ማላ ጊዲኮ ኢዛ ጌሎንታ ዲዛኮ ዳሮ ኡፋይሳን ዴኣንዱስ፤ ታሰካ ታናን ጸሳ አያናይ ዲዛ ሚሳቲስ።

8

ኤቃስ ያርሼቲዳ አሾ ሙሳ ጊሻስ

1 ኤቃስ ሹኬቲዳ አሾ ጊሻስ ኢንቴ ታስ ጸፊዳይሳ ማላ ጊዲኮ ቱሙካ ኦ ዉሪካ ኤሪዛ ሚሺ ዴስ፤ ኤሪይ ኦቶሪሴስ፤ ሲቆይ ጊዲኮ ጎኤስ።

2 ታ ኤራይስ ጊዛ አሲ ኤራናስ ቤሲዛ ማላ ቡሮ ኤሪቤና።

3 ጸሰ ሲቁዛዴይ ጊዲኮ ኢዚ ጸሳ አቻን ኤሬቲዳዴ።

4 ሄሳ ጊሻስ ኤቃስ ያርሼቲዳ አሾ ሙሳ ጊሻስ ታ ኢንቴስ ጊዛይ ሃይሳ አላሜዛን ኤቃይ ሃዳ ጊዲዳይሳኔ ኢሲ ጸሳፊ አቲን ሃራ ጸሲ ባይንዳይሳ ኦ ኤሮስ።

5-6 አይዴካ ጊዲኮ ዳሮ ኤቃቲኔ ዳሮ ጎዳቲ ዴቴስ ሸን ሳሎን ጊዲን ሳኦ ቦላ ጸሰ ጌቲቲዛ ዳሮ ኤቃቲ ዲኮካ ኦስ ጊዲኮ ሃኒዳይ ዉሪካ ኢዛን ሃኒዴስ። ኦኒካ ኢዛስ ጊዲዳ ኢሲ ጸሲ አዋይ ዴስ፤ ቃሴካ ሃኒዳዚ ዉሪካ ኢዛን ሃኒዳይ ኦኒካ ኢዛን ሃኒዳ ኢሲ ጎዳይ ዬሱስ ኪርስቶሲ ጸላላ ኦስ ዴስ።

7 ጊዶ አቲን ሄሳ አሲ ዉሪ ኤሪና፤ ኢሲ ኢሲ አሳቲ ሃኖ ጋካናስ ኤቃ ጎይኖ ዶሲዳ ጊሻስ ሄሳ ማላ አሾ ሚሼ አዳካ ኤቃስ ሹኬቲዳይሳ ቆፔቲስ፤ ኢስታስ ቆፋይ ላፋ ጊዲዳ ጊሻስ ኢስቲ ቱኔቲስ።

8 ጊዶ አቲን ካሊ ኦና ጸሳ አች ጋፊና፤ ኦ ሞንታ ኣጊኮካ ኦስ ፓጪዛይ ዴና፤ ኦ ሚኮካ ኦስ ዎጼይ ዴና።

9 ጊዶ አቲን ኢንቴ ሜቶይ ባ ጉሳን ኦሊዛይሲ አማኖን ሚኖንታ አሳስ ቋጹ ጊዶንታ ማላ ናጌቲቴ።

10 ኔስ ሄሳ ሚሳቲዛ ኤራቴሊ ዲዛ ጊሻስ ሂንኮ አማኖን ሚኖንታዴይ ኤቃ ኬላን ኔ ሚዛይሳ ቤኢዲ ኤቃስ ሹኬቲዳይሳ ማናስ ጸሌኔ?

11 ሄሳ ጊሻስ ኪርስቶሲ ኢዛ ጊሻስ ሃይቂዳ ሄ አማኖን ሚኖንታ ኢሻይ ኔ ኤራቴላ ጋሶን ቋዬስ ጉሳ።

12 ሃሳቶካ እንቴ እንቴ አሻታ ቆሆኒኔ አሰታ ላፋ ቆፋ ማዲንፉን ከርሰቶሳ ቆሄታ።

13 ሄሳ ገሻሰ ታ ሚዛ ሚሺ ታ አሻ ቋጺዛዝ ጊዲኮ ታ አሻ ታ ቋጺፉንታ ማላ ሙሌካ አሾ ሚኬ።

9

ሃዋሬታስ ዲዛ ማታ

1 ታኒ ጎቃ አሰ ጊዲኪና? ታ ሃዋሬ ጊዲኪና? ኑ ጎዳ ዬሱሳ ታኒ ታ አይፌራ ቤያቤኪና? እንቴካ ጎዳን ታ ኦሶን ቤቲዳ አይፌ ጊዴኬቲ?

2 ሃራታስ ታ ሃዋሬ ጊደንታ አገኮካ ታ እንቴሰ ቱማፔ ሃዋሬ፤ ጋሶይካ ጎዳን ታ ሃዋሬቴፋ ቤሲዛ ማታሜይ እንቴና።

3 ታና ፓፌዛይታስ ታ አሚዛ ዛርይ ሄሳ።

4 ኤሮ! ማናሲኔ ኡያናሰ ኑሰ ቤሴኔ?

5 ሃራ ሃዋሬታ ማላ ጎዳ አሻታ ማላኔ ኬፋንታ ማላ ኑኒካ አማኒዛ ኑ ማቺታ ኤኪ ዩያና ዳንዳዮኮኒ?

6 ዋይኮ ዋዬቲ ዳቡርዲ ዳናሰ ቤሲዛይ ታናኔ ባርናባሳ ጸላ?

7 ኤሮ! ባ ሚሻራ ዋታዳራቴል ኦሊዛይ ኦኔ? ዋይኔ ሚል ቶኪዲ ሄ ቶኪዲ ሚሳ አይፌ ሞንታይ ኦኔ? ሜሄ ሄሚሺ ባ ሄሚዛ ሜሄዛ ማል ኡዮንታይ ኦኔ?

8 ታ ሃይሳ ገዛይ ጮ አሳ ቆፋ ማላ ጸላ? ሙሴ ዋጋይ ሄሳል ጌኔ?

9 ሙሴ ዋጋ ጋርሳን፥ «ካል ቡኪዛ ሜሄ ዶና ቃቾፋ» ጌቲቲ ጸፊቲዴሰ፤ ሂሰቲን ጸሰ ሜቲዳይ ሄ ሜሄዛ ቃንፊ?

10 ኢዚ ሄሳ ጊዳይ ቱማፔ ኑ ገሻሰ ጊዴኔ? ሄሲ ጸፊቲዳይ አዳፌ ኑ ገሻሳ፤ ጎሻንቻይኔ ቃሴካ ቡኪዛይሲ ባ ኦሶ አይፌፔ ባና ጋኪዛይሳ ኤካናሰ ሂደታ ኦፊሰ።

11 ኑ እንቴ ጊደን አያና ዜሬል ዜሪዳይቲ አሾሰ ጊዲዛዝ ማጺኮ ሄሲ ጊታ ሚሺ?

12 ሃራ አሳቲ እንቴፌ ሄሳ ማላ ጎኣ ኤካናሰ ዳንዳይኮ ኑ ቃሴ ሄሳፌ ዳሮ ዳማናሰ ቤሴኔ? ጊደ አቲን ኑኒ ኑሰ ቤሲዛ ማላ ጎኤቲቤኮ፤ ሃራፔካ ኑ ከርሰቶሳ ሚሺራቾ ቃላሰ ቋጺ ጊደንታ ማላ ሃኒዛዝ ኡባካ ዳንዳዮሰ።

13 ጸሳ ኬላን ኦሴዛይቲ ባ ማናይሳ ጸሳ ኬላፌ ኤኪዛይሳ ማላ ያርሾሶን ኦሴዛይቲካ ሄ ባ ያርሺዛይሳፊ ሚዛይሳ ኢንቴ ኤሬኬቲ?

14 ሄሳሶካ ሚሺራቾ ቃላ ሳባኪዛይቲ ባስ ኮሺዛይሳ ሚሺራቾ ቃላ ኦሴዛሶፔ ኤካና ማላ ጎዳይ ዋጋ ዋሴዳስ።

15 ታኒ ጊዲኮ ሄሳ ኡባፊካ አይኮካ ጎኤታቤኬ፤ ሃኢካ ታ ኢንቴስ ሃይሳ ጸፊዛይ ሄይታንታ ማላ ሚሽ ታስ ኦሴቶ ጋዳ ጊዳና። አይስ ጊኮ ኦኒካ ታኒ ታ ጎዳን ጨቄቲዛር ታፔ ዋሴ ኤካናፔ ታስ ሃይቆይ ሎኦ።

16 ሚሺራቾ ቃላ ሳባኪዳይሲ ታና ጨቄሴና፤ ታ ሳባኪዛይ ዶሳን ጊዶንታ ዋልቃራ ታና ጋኪዳ ጊሻሳ፤ ታ ሚሺራቾ ቃላ ሳባኮንታ ኣጊኮ ታስ ኣዬ ኣና!

17 ሚሺራቾ ቃላ ታኒ ታ ዶሳን ሳባኪኮ ታስ ዋይቶይ ዴስ፤ ታኒ ታ ዶሳን ጊዶንታ ዋልቃራ ኦሴዛይሳ ጊዲኮ ሃዳራ ፖላና ማላ ኦሶ ጸላላ ጊዳና።

18 ሂስቲን ታስ ኣዛ ዋይቶይ ዲዜ? ታስ ዋይቶይ ዳናይ ሚሺራቾ ቃላ ሳባካሼ ታስ ቤሲዛይታ ታ ጎኤቶንታ ኣጊኮኮ።

19 ታ ጎቃፔ ኣቲን ኦናስካ አይሌ ጊዲኬ፤ ጊዶ ኣቲን ዳርታ ጎዳኮ ዛራና ጊሻስ ኣሳ ኡባስ አይሌ ማላ ጊዳዲስ።

20 አይሁዳታ አሻናስ አይሁዳታራ ኢስታ ሚሳታዲስ፤ ታኒ ታ ባጋራ ሙሴ ዋጋፔ ጋርሳራ ጊዶንታ ዳሼ ሙሴ ዋጋፔ ጋርሳራ ዲዛይታ አሻናስ ኢስታ ሚሳታዲስ።

21 ታኒ ታ ባጋራ ጸሳ ዋጋይ ዲዛዴኔ ከርስቶሳ ዋጋስ ሃሬቲዛዴ ጊዲኮካ ዋጋይ ባይንዳይታ አሻናስ ኢስታ ማላ ዋጋይ ባይንዳዴ ጊዳዲስ።

22 ዳቡራንቻታ አሻናስ ጋዳ ታኒካ ዳቡራንቻታራ ኢስታ ማላ ዳቡራንቻ ጊዳዲስ፤ ታስ ዳንዳዬቲዳ ማላ ኡባን ኢሲ ኢሲ ኣሳታ አሻናስ ኣሳ ኡባራ ኢስቲ ሃኒዛዝ ሃናዲስ።

23 ታ ሃይሳ ዉርሳ ኦሴዛይ ሚሺራቾ ቃላ ኣንጆ ኢስታራ ጊሼታናስ ሚሺራቾ ቃላ ጊሻስ ኦላዲስ።

24 ጋዴ ዋላ ዋጺዛይቲ ዳር ሺን ጸኒዲ ዋይቶ ዴሚዛይ ኢሳዴ ጸላላ ጊዲዳይሳ ኢንቴ ኤሬኬቲ? ሄሳ ጊሻስ ዋይቶ ኤካናስ ዋጺዛዴ ማላ ኢንቴካ ዋጺቲ።

25 ጋዴን ዋጺ አቆናሰ ገጌቲዛዴይ ኦኒካ ሃኖ ኡባን ባርካ ባና ናጌሰ። ሄይታንጉቲ አቆናኔ ቆያና አኪሊሌ ኤካናሰ ዳቡሬቴሰ ሺን ኑ ቃሴ ሚርናሰ ቆዮንታ አኪሊሌ ዴማናሰ ዳቡርሰ።

26 ሄሳ ገሻሰ ታ ቃሴ ፖሎይ ባይንዳ ጮ ሜላ ዋጺዛዴ ማላ ዋጺኬ፤ ቃሴካ ጫርኮራ ባጾቲዛዴ ማላ ጮ ሜላ ጋዴን ባጾቲኬ።

27 ታ ቃሴ ሃራታሰ ሳባካ ፔአዳ ታሰ ኩንዳ አቶንታ ማላ ታ አሳቴል ሺሻ ኦይካዳ ሃራይሰ።

10

ኢስራኤሌ ናይታ ቦላ ጋኪዳይሲ ጋኮንታ ማላ ናጌቴል

1 ታ አሻቶ! ካሴ ኑ አዋቲ ሻራይ ኢስታፌ ቦላራ ገዲዲ ካሌሊዳይሳ ማላኔ ኢስቲ ወሪካ ዞኦ አባ ፒኒዳይሳ ታ ኢንቴና ቆፍሳናሰ ኮያይሰ።

2 ኢስቲ ሙሴራ ገዳናሰ ገዲ ሻራኒኔ አባን ጸማቂቲዳ።

3 ወሪካ ኢሲ አያና ቁማ ሚዳ።

4 ወሪካ ኢሲ አያና ኡሹ ኡዬዳ፤ ኢስቲ ኡዬዳይካ ባና ካሊዛ አያና ዛላፌ ፑልቲዳይሳፌ፤ ሄ ዛላይካ ከርሰቶሳ።

5 ገዶ አቲን ጸሲ ዳርታን ኡፋዬቲቤና፤ ሄሳ ገሻሰ ኢስታ አሃይ ባዞን ኩንዲ አቲዴሰ።

6 ኢስቲ ኢታ ሚሽ አሞቲዳይሳሶ ኦኒካ አሞቶንታ ማላ ኢስታ ሃኖይ ኑ ናጌታና ማላ ኑሰ ለሚሶ ገዲዴሰ።

7 «ዴሬይ ማናሲኔ ኡያናሰ ኡቲዴሰ፤ ዬጸናሰካ ዴንዲዴሰ» ጌቴቲ ካሴ ጌሻ ማጸፋን ጸፊቲዳ ማላ ኢስታ ጋርሳፌ ኢሲ ኢሲ አሳቲ ኦሶይሳሶ ኢንቴካ ኤቃ ጎይኒዛይታ ገዶፒቴ።

8 ኢስታ ጋርሳፌ ኢሲ ኢሲ አሳቲ ላይማቲዲ ኢሲ ጋላሰ 23,000 አሳይ ዲፒ ገ ወርይሳሶ ወርንታ ማላ ኦኒካ አኔ ላይማቶኮ።

9 ኢስታ ጋርሳፌ ኢሲ ኢሲ አሳቲ ጎዳ ፓጪዲ ሾሻን ዱኬቲ ሃይቁ ቆይዳይሳ ማላ ኦኒካ አኔ ጎዳ ፓጮኮ።

10 ኢስታ ጋርሳፌ ኢሲ ኢሲ አሳቲ ዙተሚዲ ቆይሲዛ ቦሻ ኪታንቻን ቆይዳይሳሶ ኢንቴካ ቆዮንታ ማላ ዙተሞፒቴ።

10:1 ኬሳ 13:21-22፤ 14:22-29 10:3 ኬሳ 16:35 10:4 ኬሳ 17:6

10:5 ታይ 14:29-30 10:6 ታይ 11:4 10:7 ኬሳ 32:6 10:8 ታይ 25:1-18 10:9 ታይ 21:5-6 10:10 ታይ 16:41-49

11 ሄሲ ወሪ ኑስ ለሚሶ ጊዳና ማላ ኢስታ ቦላ ጋኪዳስ፤ ዋዴ ወርሴላን ዲዛ ኑስ ቲሚርቲ ጊዳና ማላ ኑስ ጸፊቲዳስ።

12 ሄሳ ጊሻስ ታ ሚና ኤቃ ዳይስ ጊዛይይ ዲኮ ኩንዶንታ ማላ ባስ ናጌቶ።

13 አሳ ቦላ ጋኪዳ ፓጩፔ ሃራ አጳዛ ፓጩይ አንቲ ቦላ ጋኪቤና፤ ጸሲ አማኔቲዛ ጸስ ጊዲዳ ጊሻስ አንቲ ዳንዳዮንታ አንቲ ዋልቃፌ ቦላራ አንቲ ፓጩፔና ማላ ኢዚ አንቲና አጋጌና፤ ጊዶ አቲን አንቲ ፓጩቲዛ ዋዴ ሄ ፓጩዛ አንቲ ዳንዳዮና ማላ ዋልቃ አሚዲ ፓጩፔ አንቲ ኬሲ ኤካና ኦጌ ኢዚ አንቲስ ጊሊና።

ኤቃራ ኢሲፊቴላ ዳናስ ቤሴና

14 ሄሳ ጊሻስ ታ ሲቆቶ! ኤቃስ ጎይኖፍቲ፤ ኢዛፔ ሃኪቴ።

15 ታ አንቲስ ሃይሳ ጊዛይ ዋዚናማ ጊዲዳ ጊሻሳ፤ ሄሳ ጊሻስ ታ ዮቲዛይሳ አኔ አንቲ አንቲርካ ፒርዲቴ።

16 ኦኒ ጸሳ ጋላቲዲ ኤኪዛ ኡሻይ ኪርስቶሳ ሱላራ ጋጎቴላ ዲዛይሳ ጊዴን? ሄሳሶካ ኑ ባሊ ባሊ ጊሼቲ ሚዛ ኡኬላይ ኪርስቶሳ አሾራ ጋጎቴላ ዲዛይሳ ጊዴን?

17 ኡኬላይ ኢሲኖ ጊዲዳ ማላ ኦኒካ ዳር ጊዲ ኡቲዲ ወሪካ ኢሲ አሾ፤ ኑ ወሪካ ኢሲ ኡኬላዛ ጊሼቲ ሞስ።

18 አኔ አንቲ ኢሰራኤሌ ናይቲ ኦሊዳይሳ ቆፒቴ፤ ሸቁዛ ያርሾዛፔ ሚዛይታስ ያርሾይ ሸቁዛሶራ ጋጎቴላ ዴን?

19 ሂስቲን ኤቃስ ያርሼቲዳ ያርሾ ጊዲን ዋይኮ ኤቃይ ባ ባጋራ ጎኣራ ዴስ ጋዚና?

20 ጊዴና! አማኖንታ አሳይ ሺሺዛ ያርሾይ ጸሳስ ጊዶንታ ጸላኤሳ፤ አንቲስ ጸላኤራ ኢሲፊቴላ ዳና ማላ ታ ኮይኬ።

21 ጸላኤ ኡሺኔ ጎዳ ኡሹ አንቲ ኢሲፊ ጋሊ ኡያና ዳንዳዬኬታ፤ ጎዳ ማዳፌኔ ጸላኤ ማዳፌ ጋሊ ማና ዳንዳዬኬታ።

22 ኦኒ ጎዳ ሃንቄሊኖ? ኑ ኢዛፔ ሚኒዞኒ?

ኡባካ ጸሳ ቦንሻስ ኦሶ

23 ወሪካ ታስ አማቲዳስ ሺን ወሪካ ታና ጎኢዛዝ ጊዴና፤ ወሪካ ታሳ ሺን ወሪካ ታና ማዴና።

24 አሲ ወሪካ ባ ላጌ ጎኣናዝ ጋሊ ጴሎ አቲን ባና ጎኣናዝ ጸላላ ኮዮፖ።

- 25 ጊያን ባይዘቲዛ አሾ ኡባ ሲጾይ ባይንዳ ማቲ።
 26 ቢታይኔ ቢታ ቦላ ዲዛይ ወሪካ ጎዳይሳ።
 27 አማኖንታ አሲ አንቴና ባሶ ጾይጊዲ ሺሺዳ ካል ወርሲ አይኮካ ሲጾንታ ማቲ።
 28 ጊዶ ኣቲን አሳዳይ፥ «ሃይሲ ኤቃሰ ያርሼቲዳ ካላ» ጊኮ ሄ ካላ ሄ አዳዛ ቆፋ ጊሻሲኔ አንቴና ሲጾሰኮ ሞፒቴ።
 29 ታ አንቴሰ ሄሳ ጊዛይ ሄ ዮቲዳዴ ቆፋ ጊሻሰ ጋዲሰ ኣቲን አንቴ ቆፋ ጊሻሰ ጋቤኬ፤ ታ ጸሎ ጊዳ ዲሺን ኣዛሰ ሃራ ኣሳ ቆፋ ጋሶን ታ ቦላ ፒርዴቲዜ?
 30 ታ ጸሰ ጋላታዳ ማዛዴ ጊዳ ኡታዳ ኣዛሰ ሃራ ኣሳን ፒርዴቶ?
 31 ሂሰቲኮ አንቴ አይ ማኮካ፥ አይ ኡዩኮካ ዎይኮ አይኮ ኦሊኮ ወርሲካ ጸሳ ቦንሻሰ ኦሊቴ።
 32 አይሁዳ ኣሳሰ ጊዲን አይዛቤታሰ ጊዲን ዎይኮ ጸሳ ዎሳ ኬላሰ ኦናሰካ ጶጶ ጊዶፒቴ።
 33 ታ ኣሰ ወርሳካ አይ ኦጌራካ ኡፋይሳና ኮይዛ ማላ አንቴካ ሄሳሶ ኦሊቴ፤ ዳርቲ ኣታና ማላ ታ ታና ጎኢዛዝ ጊዶንታ ኢሰታ ጎኢዛዝ ኮያይሰ።

11

1 ታኒ ኪርሰቶሳ ሌሚሶ ካሊዛ ማላ አንቴካ ታ ሌሚሶ ካሊቴ።

ጸሳ ጎይኖ ዎጋ

- 2 አንቴ ታሰ ወርሲ ቆፒዛ ጊሻሲኔ ታፔ ኤኪዳ ቲሚርቲዛ ሎኤሊ ኦይኪዳ ጊሻሰ ታ አንቴና ጋላታይሰ።
 3 ጊዶ ኣቲን ታ አንቴ ኤራና ማላ ኮይዛይ ኣቱማሳሰ ኡባሰ ሁኤይ ኪርሰቶሳ ጊዲዳይሳ ማላ ኣቱማሳይ ማጫሰ ኡባሰ ሁኤ፤ ቃሴ ጸሲ ኪርሰቶሳሰ ሁኤ።
 4 ባ ሁኤ ጉሉንቲዲ ጸሰ ዎሲዛዴይ ዎይኮ ቃላ ዮቲዛዴይ ኦኒካ ባርካ ባና ካወሹሰ።
 5 ባ ሁኤ ጎዞንታ ዎሲዛ ማጫሳያ ዎይኮ ቲንቢቴ ቃላ ዮቲዛ አይ ማጫሲካ ባርካ ባና ካወሻወሰ፤ ሄሲ ኢዛ ባ ሁኤ ቡሊሲዳዴራ ጊና።
 6 ማጫሲ ባ ሁኤ ጎዞንታ ኣጊኮ ሜዴቱ ዎይኮ ቃንጸሱ፤ ኢዚሰ ሁኤ ሜዴቲሊ ዎይኮ ቃንጸሱሊ ዬላቺዛዝ ጊዲኮ ጎዙ።
 7 አዴይ ባ ሁኤ ጉሉንታናሰ ቤሴና፤ ኣቱማሲ ጸሳ ሌሚሶኔ ጸሳ ቦንሻ፤ ማጫሲ ጊዲኮ ኣዴሰ ቦንሻ።

8 ጋሶይካ ማጫሲ አዳፌ ሜዴታዱሰ አቲን አቱማሲ ማጫሳፌ ሜዴቲቤና።

9 ቃሴካ ማጫሲ አዳሰ ሜዴታዱሰ አቲን አዳይ ማጫሳሰ ሜዴቲቤና።

10 ሄሳ ጊሻሰ ኪታንቻቲ ቤያናሰ ናጊዛ ማጫሳሰ አሜቲዳ ማታ ቤሲዛ ጎሴ ባ ሁኤን ጎዙ።

11 ጎዳ አቻን ጊዲኮ ማጫሲ አዳይ ባይንዳ፥ አዳይካ ማጫሲ ባይንዳ ዴኤቴና።

12 ማጫሲ አዳፌ ቤቲዳይሳሶ አዳይካ ማጫሳፌ ዬሌቴሰ፤ ጊዳ አቲን ናሞአይካ ጸሳፌ ቤቲዳ።

13 ማጫሲ ባ ሁኤ ጎዘንታ ጸሰ ዋሳናሰ ቤሲዛኮ እኔ አንቴ ፒርዲቴ።

14 አቱማሲ ባ ሁኤ አዱሲ ዲቺኮ ቦርሶ ጊዲዳይሳ አንቴና ሜዴቲላ ሃናቴሲ ኤሪሱዌ?

15 ማጫይ ጊዲኮ ባ ሁኤ ቢናና ዲቺኮ ሄሲ አዚሰ ቦንቾ ጊዴኔ? አዚሰ አዱሳ ሁኤ ቢናናይ አሜቲዳይ አዚሰ ሴሎ ጊዳናሳ።

16 ሄሳ ጊሻሰ ኦኒካ ሃይሳ ሃ ዮኦዛን ፓላሜታና ኮይኮ ኑሰ ጊዲንካ ጸሳ ዋሳ ኬላታሰ ሃይሳፌ ሃራ ዋጋይ ዴና።

ጎዳ ካዋ ኤኮ ዋጋ

17 አንቴ አሲ ሶ ሺቄቲዛ ዋዴ ቆሆሰ አቲን ጎኦሰ ጊዶንታ ጊሻሰ ታ ሃይሳ አዛዞዛ አንቴሰ አሊዛይ አንቴና ጋላታሼ ጊዴና።

18 አንቴ ዋሳ ኬላን ሺቄዛ ዋዴ አንቴ ጋርሳን ሻኬቴሊ ዲዛይሳ ታ ካሴታ ሲያዲሰ፤ ታ ሲዮይሳፌ ባጋይ ቱሙ ጊዳናይሳ ታ አማናይሰ።

19 አንቴ ጊደፌ ቱማንቻቲ ሻኬቲ ኤሬታና ማላ ሄሳ ማላ ሻኮይ አንቴ ጊዶን ዳናይሲ ዶሳ ጊዴና።

20 አንቴ አሲፌ ሺቄቲዲ ሚዛይ ጎዳ ካዋ ጊዴና።

21 አንቴ ሺቄቲዲ አሶይ አሳ ናጎንታ ዲሼ ካሐ ሜታ፤ አንቴፌ አሳዴይ ጋፋን ዲሺን ሃንኮይሲ ቃሴ ማሶቴሰ።

22 ሂሰቲን አንቴሰ ኡያናሶይኔ ማናሶይ ባዌ? ዋይኮ ጸሳ ኬሌ ሌቂዲ አይኮይካ ባይንዳይታ ዬላቺቲ? ሂሰቲን ታ አንቴና አይ ጎ? ሃይሳ ሃ ሃናዛሰ አንቴና ጋላቶ? ሙሌካ ጋላቲኬ።

23-24 ታኒ ጎዳፔ ኤኪዳይሳ አንቴሰ አላዲሰ፤ ሄሲካ ጎዳ ዬሱሲ አዲ አሜቲዳ ኦማርሰ ኡኬሐ ዴንሊዲኔ ጸሰ ጋላቲ ባሊዲ፥ «ሂኢቲ! ሚቲ! ሃይሲ አንቴሰ ጊዲዛ ታ ኣሾ፤ ታና ቆፓናሰ አንቴ ሃይሳ ኦሊቲ» ጊዴሰ።

25 ሄሳሶካ ካዎፔ ጉዬ ኡሻ ዳንሊዲ፥ «ሃይሲ ኡሻይ ታ ሱላን ሃኒዛ ኦራላ ጫቆ፤ ሄሳ ጊሻሰ ኡሻፌ ኢንቴ ኡዪዛ ዎዴ ሃይሳ ታና ቆፓና ማላ ኦሊቴ» ጊዴሰ።

26 ሃይሳ ኡኬላ ኢንቴ ሚዛ ዎዴኔ ሃይሳ ኡሻካ ኡዪዛ ኡባ ዎዴ ጎዳይ ያና ጋካናሰ ኢንቴ ኢዛ ሃይቆ ዮታና።

27 ሄሳ ጊሻሰ ኦኒካ ቤሶንታ ዲሺን ሃይሳ ኡኬላ ሚኮ ዎይኮ ጎዳ ኡሻ ኡዪኮ ኢዛዴይ ጎዳ ኣሾኔ ኢዛ ሱላ ካዉሺዳ ጊሻሰ ኢዚ ኦይሼታና።

28 ኦኒካ ሃይሳ ሃ ኡኬላ ማናፔኔ ኡሻፌ ኡያናፔ ካሴቲ ባርካ ባና ፓጮ።

29 ጋሶይካ ኦኒካ ጎዳ ኣሾ ባሰ ጌሎንታ ዲሺን ሚኮኔ ጎዳ ኡሻ ኡዪኮ ኢዛዴይ ባርካ ባ ቦላ ፒርዳ ኤሄሰ።

30 ኢንቴ ጋርሳን ዳር ኣሳይ ዳቡርዳይኔ ሳኬቲዳይ ቃሴካ ባጋይ ሃይቂዳይ ሄሳ ጋሶና።

31 ኦኒ ኦርካ ኦ ቦላ ፒርዲዛኮ ኢዚ ኦ ቦላ ፒርዳና።

32 ጊዶ ኣቲን ጎዳይ ፒርዲዛ ዎዴ ኦ ሃንኮ ኣማኖንታ ኣሳራ ፒርዳቶንታ ማላ ኢዚ ኦና ካሴቲ ሙሬሰ።

33 ሄሳ ጊሻሰ ታ ኢሻቶ! ኢንቴ ማና ሺቂዛ ዎዴ ኢሶይ ኢሳራ ናጌቲቴ።

34 ኢንቴ ሺቂዛ ሺቆይ ፒርዳሰ ጊዶንታ ማላ ኢንቴፌ ኦኒካ ጋፊዳዴይ ዲኮ ካሴቲዲ ባ ሶን ዋ፤ ሃንኮ ኣቲዳይሳ ታኒ ሃራ ዎዴ ሄ ኢንቴኮ ባዳ ዎጋ ዎላና።

12

ጲሎ ኣያና ኢሞታታ

1 ታ ኢሻቶ! ኣያናይ ኢሚዛ ኢሞታ ጊሻሰ ኢንቴ ኢሲ ሚሽ ኤራና ማላ ታ ኮያይሰ።

2 ኢንቴ ኣማናናፔ ካሴ ጮ ሚላ ያኔ ሃ ጉሳን ኢንቴ ኤርንታ ካሊዲ ዶና ዱዴ ጊዲዳ ኤቃታኮ ቢዳይሳ ኢንቴካ ኤሬታ።

3 ሄሳ ጊሻሰ ኦኒካ ጸሳ ኣያናን ሃሳይሼ፥ «ዬሱሲ ቃንጌቲዳዴ» ጌና። ሄሳሶካ ጲሎ ኣያናን ጊዲዲ ኣቲን ኦኒካ፥ «ዬሱሲ ጎዳ» ጋና ኣሲ ዶንታይሳ ታ ኢንቴሰ ዮታይሰ።

4 ኣሳሰ ኢሞቴሊ ዱማ ዱማ ጊዲሺን ኣያናይ ጊዲኮ ኢሲኖ።

5 ኦሶይካ ዱማ ዱማ ጊዲሺን ጎዳይ ጊዲኮ ኢሲኖ።

6 ዱማ ዱማ ኦሶ ኦጌቲ ዲኮካ ዉርሲካ ኦሊዛይ ኢሲ ጸሳ።

7 ጊዶ ኣቲን ጸሎ ኣያና ቆንጪሶ ኢሞታይ ኢሳዴስ ኢሜቲዛይ ኢሲፌ ጎኤታናሳ።

8 ኢሳዴስ ሂላን ሃሳያና ኤራቴሊ ኢሜቲስ፤ ሃራ ኣሳሰ ቃሴ ሄ ኣያናንካ ኤራቴላ ቃላን ሃሳያና ቃላይ ኢሜቲስ።

9 ኢሳዴስ ሄ ኣያናን ኣማኖይ ኢሜቲስ፤ ሃራ ኣሳሰ ቃሴ ሄ ኣያናንካ ሃርጊዛይታ ፓሊዛ ኢሞታይ ኢሜቲስ።

10 ኢሳዴስ ማላሊሲዛ ኦሶ ኦሊዛ ኢሞታይ፥ ሃራ ኣሳሰ ቲንቢቲ ቃላ * ሃሳያ ኢሞታይ፥ ሃራ ኣሳሰ ቃሴካ ኣያናታ ሻኪ ኤርይ፥ ሃራ ኣሳሰ ዱማ ዱማ ቃላን ሃሳያይ፥ ቃሴካ ሃራ ኣሳሰ ሃራ ዱማ ዱማ ቃላን ሃሳይቲዳይሳ ቢርሻና ኢሞታይ ኢሜቲስ።

11 ሄይቲ ዉሪካ ሄ ኢሲ ኣያናይ ኢሚዛ ኢሞታ ጊዲሺን ኢሲ ኢሲ ኣሳሰ ባ ኮዪዳ ማላ ኢሜስ።

ኢሲ ኣሳቴላ ቦላ ዱማ ዱማ ቢሊቲታ

12 ኢሲ ኣሳቴላ ቦላ ዳር ቢሊቲቲ ዲኮካ ኣሳቴላይ ኢሲኖ፤ ጊዶ ኣቲን ቢሊቲቲ ዳር ጊዲኮካ ኣሳቴላይ ኢሲኖ ጸላ፤ ከርሰቶሲካ ሄሳ ማላ።

13 ኣይሁዳ ኣሳታ ጊዲንካ ጊሪኬ ኣሳታ ጊዲንካ፥ ኣይሌ ጊዲንካ ዋይኮ ጎቃ ኣሳታ ጊዲንካ ኦ ዉሪካ ኢሲኖ ጊዳናሰ ኢሲ ኣያናን ጸማቂቲዶስ፤ ኦ ዉሪካ ሃ ኢሲ ኣያናፔ ኡዪዶስ።

14 ኣሳቴሊ ሜዴቲዳይ ዳር ቢሊቲታፔ ኣቲን ኢሲ ቢሊቲፌ ጸላላ ጊዳና።

15 ቶሆይ፥ «ታኒ ኩሼ ጊዶንታ ጊሻሰ ኣሳቴላ ጊዶን ዲኬ» ጊኮ ኢዚ ሂዘጊዳ ጊሻሰ ኢዛሰ ኣሳቴላን ዱሲ ኣታኔ?

16 ሃይሊ፥ «ታ ኣይፌ ጊዶንታ ጊሻሰ ኣሳቴላ ጊዶን ዲኬ» ጊኮ ሄሳ ጊሻሰ ኣሳቴላን ዱሲ ኢዛሰ ኣታኔ?

17 ኣሳቴሊ ዉሪካ ኣይፌ ጸላ ጊዲዳኮ ኣዛን ሲያኔ? ኣሳቴሊ ዉሪካ ሃይሊ ጸላ ጊዲዳኮ ኣዛን ሲንጋኔ?

18 ጊዶ ኣቲን ጸሲ ኢሳ ኢሳ ባ ኮዪዳ ማላ ኣሳቴላ ጊዶን ዳናሰ ቤሲዛሶን ዋሊዶስ።

19 ቢሊቲይ ዉሪካ ኢሲኖ ጊዲዳኮ ኩሜላ ኣሳቴሊ ኣዋፔ ቤታኔ?

20 ሄሳ ጊሻሰ ቢሊቲቲ ዳር ሺን ኣሳቴሊ ጊዲኮ ኢሲኖ ጸላ።

21 ኣይፌይ ኩሼ፥ «ኔና ታ ኮይኬ» ጋናሰ ዳንዳዬና፤ ሁኤይ ቶሆ፥ «ኔና ታ ኮይኬ» ጋና ዳንዳዬና።

22 ሃራይ ኣቶሺን ኡባፌ ላፋ ሚሳቲዛ ቢሊቲቲ ዳር ኮሺዛይታ።

* 12:10 ቲንቢቲ ቃላ፡ ቲንቢቲ ቃላ ጸሳ ቃላ ቢርሼላ ዋይኮ ቆንጪሲ ዮቶ።

12:12 ኦር 12:4-5

23 ኑኒ ላፋ ጊ ሌቂዛ ቢሊቲታ ሃንኮይታፔ አሊ ቦንቸሰ፤ ቃሴካ ኑ ኢሰታን ዬላቲዛ ቢሊቲታ ሃራፔ አሊ ናጎሰ።

24 ኑ ኢሰታን ዬላቸንታ ቢሊቲታ ጊዲኮ ሄሳ ማላ ቦንቸ ኮሼና፤ ጸሲ ጊዲኮ አሳቴላ ቢሊቲታ ኢሲ ቦላ ኦይሴሊዲ ቦንቸይ ፓጪዛይታሰ አጼላ ቦንቸ ኢሚዴሰ።

25 ኢዚ ሄሳ ኦሊዲይ አሳቴላ ቢሊቲታ ጋርሳን ሻኬቴሊ ዶንታ ኢሰቲ ባ ጋርሳን ኢሶይ አሳ ባናራ ገና ጊ ቆፓናሳ።

26 ኢሲ ቢሊቲይ ሳኬቲኮ ሃንኮ ቢሊቲቲ ወሪካ ኢዛራ ኢሲፌ ሳኬቴቲሰ፤ ኢሲ ቢሊቲይ ቦንቸቲኮ ቢሊቲቲ ወሪካ ኢሲፌ ኡፋዬቴቲሰ።

27 ሂሰቲኮ ኢንቴ ወሪካ ኪርሰቶሳ አሳቴላ፤ ኢንቴ ኢሶይ ኢሶይ ኢዛ አሳቴላ ቢሊቲታ።

28 ጸሲ ዋሳ ኬላ ጊዶን ኮይሮ ሃዋሬታ፡ ናምኣንሶ ቃሴ ናቤታ፡ ሃቫንሶ አሰታማሬታ፡ ካሌሊዲ ማላታ ኦሊዛይታ፡ ፓሊዛ ኢሞቴሊ ዲዛይታ፡ ሃራታካ አሰ ማዲዛ ኢሞታይ ዲዛይታ፡ ዴሬ አይሶ ኤራቴሊ ዲዛይታኔ ዲማ ዲማ ቃላ ሃሳያና ኢሞቴሊ ዲዛ አሳታ ዋሊዴሰ።

29 ወሪካ ሃዋሬቴ? ወሪካ ናቤቴ? ወሪካ አሰታማሬቴ? ወሪካ ማላሊሲዛ ሚሽ ኦሊዛ?

30 ኡባሲካ ሃርጊዛይታ ፓሊዛ ኢሞታይ ዲዜ? አሲ ወሪካ ዲማ ቃላን ሃሳይዜ? ዲማ ቃላን ሃሳዬቶይሳ አሲ ወሪ ቢርሺዜ?

31 ጊዶ አቲን ኢንቴ ወሪካ ኡባፌ አጂዛ ኢሞታ ሎኤሊ ኮዪቴ። ቃሴካ ሃራ ኡባፌ አጂዛ ኦጌ ታ ኢንቴና ቤሳና።

13

ቱሙ ሲቆ

1 ታ አሳ ቃላኒኔ ሳሎ ኪታንቻታ ቃላን ሃሳይኮካ ታሰ ሲቆይ ባይንዳ ኣጊኮ ጮ ሜላ ቢራታ ጊሪሳ ማላ ዋይኮ ዳላ ጊሪሳ ማላ።

2 ቲንቢቴ ሃሳይዛ ኢሞታይ ታሰ ዲኮካ፡ ዋይኮ ጸራ ዮኦታኔ ኤራቴላ ወርሳ ታ ኤሪኮካ፡ ዙማይ ኢዚ ዲዛሶፔ ቶቃላዳ ሃራሶ ዲጊዛ አማኖይ ታሰ ዲኮካ ሄሳ ወርሳካ ሲቆይ ባይንዳ ታ ኦሊኮ ሄሲ ሃዳ።

3 ታስ ዲዛዝ ዉርሳ ማንቆታስ ታ አሚኮካ፥ ታ አሳቴል ታ ታማን ጸጊኮካ፥ * ሲቆይ ባይንዳ አጊኮ ታና ሄሲ አይኮካ ማዳና።

4 ሲቆይ ዳንዳያ፥ ቃሴካ ኪያ፤ ሲቆይ ሚቃይኔና፤ ጨቄቴና፤ አቶሬቴና፤

5 በሶንታዝ አሌና፤ ባ ጎኣ ጸላ ጸሌና፤ ቆሆ ቆዳን ዩጌና።

6 ሲቆይ ቱማንፔ አቲን ማካላን ኡፋዬቴና።

7 ሲቆይ ኡባ ዎዴ ዳንዳዬሰ፤ ኡባ ዎዴካ አማኔሰ፤ ኡፋይሰ አሌሲኔ ሚኒ ኤቄሰ።

8 ሲቆይ ሙሌካ ኩንዴና፤ ቲንቢቴይ ጊዲኮ አታና፤ ሃራ ቃላን ሃሳያይካ አታና፤ ኤራቴሊካ ሻሬታና።

9 ጋሶይካ ኑ ኤሪዛይ ኡባ ጊደንታ ሻኪ ኤርሰ፤ ቲንቢቴ ሃሳያ ጊዲኮካ ባጋ ሃሳዮሰ።

10 ጊደ አቲን ዉርሴል ጋኪዛ ዎዴ ኩሜል ጊደንታ አሞታይ ሄ ዎዴ ሻሬታና።

11 ታ ጉላ ናቴቴላን ዳሼ ና ማላ ሃሳያይሲኔ ና ማላ ቆፓይሰ፤ ና ማላካ ዩሻ ቆፓይሰ፤ ካሃ ኩንሊዳፔ ጉዬ ካሴ ናቴላን ሃኒዛይሳ ዉርሳካ ዬጋ አጋዲሰ።

12 ኑኒ ሃኒ በኢዛይሲ ሃላን ጸሊዛ ማላ ጮ ቦዢ ቦዢሰ ሽን ሄ ዎዴ ጊዲኮ ኑ ኢዛ አይፌሶ ሎኤል በያና፤ ታ ሃኒ ኩሜል ጊደንታ ባጋ ጸላላ ኤራይሰ፤ ሄ ዎዴ ጊዲኮ ታኒ ታ ሁኤሰ ኤራቴዳይሳ ማላ ኤራና።

13 ሄሳ ጊሻሰ አማኖይ፥ ሂዶታይኔ ሲቆይ ሃይቲ ሄሻቲ ኤቄ ዳና፤ ሃይታ ኡባፌ አፏዛይ ሲቆ።

14

አሞታታን በሲዛ ማላ ጎኤቴል

1 ሲቆ ካለቲ፤ አያና አሞታታ ሃራፔካ ቲንቢቴ ሃሳይዛ አሞታታ ሎኤል ኮዪቴ።

2 ሃራ ቃላን ሃሳይዛዴይ ጸሳሰ አቲን አሳሰ ሃሳዬና፤ ጸራ ጊዲዳ ዮኦ አያናን ሃሳይዛ ጊሻሰ ኢዚ ጊዛይ አሳሰ ጌሌና።

3 ቲንቢቴ ሃሳይዛዴይ አሰ ሚንፊላናሰ፥ ዴንፊላናሲኔ ጎኣናሰ ሃሳዬሰ።

4 ሃራ ቃላን ሃሳይዛዴይ ቃሴ ባርካ ባና ሚንፊላሰ፤ ቲንቢቴ ሃሳይዛዴይ ጊዲኮ ዎሳ ኬላ ጎኤሰ።

* 13:3 ታማን ጸጊኮካ፥ ታማን ጸጊኮካ ጊዛይሳ ኢሲ ኢሲ ጌሻ ማጻፋቲ አቶሬቴላሰ ጌቴሰ።

5 እንቴ ዉሪካ ሃራ ቃላን ሃሳይዛኮ ታ ደሳይሰ ሺን ሄሳፊካ ቦላራ እንቴ ቲንቢቴ ቃላን ሃሳይዛኮ ታ ደሳይሰ፤ ዋሳ ከላይ ሚናና ማላ ሃራ ቃላራ ሃሳይዛይሳ ባ ሃሳይዛይሳ ቢርሾንታ ኢዚ ሃራ ቃላራ ሃሳይዛይሳፊ ቲንቢቴ ሃሳይዛይሳ እጴሰ።

6 ሄሳ ጊሻሰ ታ አሻቶ! ታ እንቴኮ ቢዛ ዋዴ ታ እንቴሰ ቆንጨሴላን ዋይኮ ኤራቴላን ዋይኮ ቲንቢቴን፥ ዋይኮ ቲሚርቴን ዮቶንታ ሃራ ቃላራ ዮቲኮ ሄሲ እንቴና ኣይ ጎኣኔ?

7 ሄሲ ጮ ሱሱልኤ ማላኔ ዲላ ማላ ሽምፖይ ባይንዳ ኢሰታ ጊሪሳሰ ዲማቴላ ሻኬቲ ኤሬቶንታ ኣጊኮ ኢዛ ዋሰቲ ኤራኔ?

8 ቃሴካ ጸሩምባይ ኣዛሰ ፑኔቲዛኮ ዋይኮ ዛዬይ ኣዛሰ ዛዬቲዛኮ ሻኪ ኤሬቶንታ ኦኔራ ፑኔቲኮ ኦኒ ኦላሰ ጊኔታኔ?

9 እንቴካ ሄሳ ማላ፤ እንቴ ዶናፔ ኤሬቲዛ ቃላይ ከዘንታ ኣጊኮ እንቴ ጊዛይሳ ኦኒ ኤራኔ? ጮ ሜላ ጫርኮን ጳያና።

10 ኣላሜ ቦላ ዳሮ ዲማ ዲማ ቃላይ ዴሰ ሺን ቢርሼላ ባይንዳ ቃላይ ባ።

11 ሄሳ ጊሻሰ ኢሳዴይ ሃሳይዛ ቃላ ቢርሼላ ታ ኤሮንታ ኣጊኮ ሃሳይዛዴሰ ታኒ ኢማላ ጊዳይሰ፤ ኢዛዴይካ ታሰ ኢማላ ጊዴሰ።

12 እንቴካ ሄሳ ማላ ኣያናን ኢሞቴላታ ዴማናሰ ኮይዛ ጊሻሰ ዋሳ ከላ ጎኢዛ ኢሞታታ ዴማናሰ ሎኤላ ኮዩቴ።

13 ሄሳ ጊሻሰ ሃራ ቃላን ሃሳይዛ ኣሲ ባ ሃሳይዳይሳ ቢርሼላ ኤራና ማላ ባሰ ዋሶ።

14 ታኒ ሃራ ቃላራ ዋሲዛ ዋዴ ታ ኣያናን ዋሳይሰ ኣቲን ታ ኢዛፔ ኣይኮካ ኤሪኬ።

15 ሂሰቲን ታ ኣይ ኦላና ማላ ታሰ ቤሲዜ? ታኒ ታ ኣያናንካ ዋሳና፤ ዋዚናን ዋሳዳካ ዋሳና፤ ታ ኣያናንካ ዬጻና። ዋዚናራካ ዬጻና።

16 ሄሳላ ጊዶንታ ኣጊኮ ኔ ጸሰ ኣያናን ጋላቲዛ ዋዴ ሄሳ ኤሮንታ ኢሲ ኢማላ ኣሲ ኔ ጋላታ ዋሳ ዋሰቲ፥ «ኣሚን» ጋናሰ ዳንዳይዜ?

17 ኔ ቤሲዛ ማላ ጋላታናሰ ዳንዳያሳ፤ ሃንኮይሲ ጊዲኮ ኢዛን ጎኤቴና።

18 ታኒ እንቴፊ ቦላራ ሃራ ቃላን ሃሳይዛ ጊሻሰ ጸሰ ጋላታይሰ።

19 ጊዶ ኣቲን ዋሳ ከላን ኤሬቶንታ ዳሮ ሺ ቃላታ ሃሳያናፔ ሃራ ኣሳታ ታማርሳናሰ ኣሳይ ኤሪዛ ኢቻሽ ቃላን ሃሳያና ደሳይሰ።

20 ታ አሻቶ! እንቴ እንቴ ቆፋን ጉላ ናይታ ማላ ጊዶፒቴ፤ ኢታ ኦሶሰ ጊዲኮ ጉላ ናይታ ማላ ጊዲቴ፤ ቆፋን ጊዲኮ ካሃ ኩንሊዳ ኣሳታ ጊዲቴ።

21 ካሴ ዋጋንካ፤

« ኢሰታ ቃላይ ኢማላ ጊዲዳ

አላጋ አሳታ ቃላራ
 ታ ሃይሳ አሳሰ ዮታና።
 ሄሳሉ ዮቲንካ ታ ጊዛዝ
 ኢሰቲ ሲዬቴና፡ ጌሰ ጎዳይ»

ጌቲቲ ካሴ ጌሻ ማጻፋን ጸፊቲደሰ።

22 ሄሳ ጊሻሰ ሃራ ቃላን ሃሳያይ አማኖንታ አሳሰ ማላታ ጌደሰ
 አቲን አማኒዛይታሰ ማላታ ጌደና፤ ቲንቢቲይ ጌዲኮ አማኒዛይታሰ
 አቲን አማኖንታይታሰ ጌደና።

23 ሂሰቲኮ ዋሳ ኬላን አማኒዛ አሳይ ኢሲፊ ሸቂዳሶን ወሪካ
 ኤርንታ ሃራ ቃላን ሃሳይሺን ሄሳ ኤርንታ አሳቲ ዋይኮ አማኖንታ
 አሳይ ሸቂዱ ሃሳይዛሶ ጌሊኮ፡ «ሃይቲ ጎዬቴሰ» ጌቲኔ?

24 ጌዶ አቲን አሳይ ወሪ ቲንቢቲ ቃላ ሃሳዬቲሺን አማሊ
 ዋይኮ አማኖንታዳይ ጌሊኮ ባ ሲዩዳይሳ ኡባ ኤራናኔ ሄ ቃላን
 ፒርዳታና።

25 ኢዛዳይ ባ ዋዚናን ቆቲ ዋሊዳዚ ወሪ ቆንጫናኔ ኢዚካ ባ
 ባጋራ፡ «ቱማፔ ጸሲ ኢንቴናራ ደሰ» ጌዲ ጉፋኒ ጸሳሰ ጎይናና።

26 ሄሳ ጊሻሰ ታ አሻቶ! ሂሰቲን አይ ጌኖ? ኢንቴ ኢሲፊ
 ሸቂዛ ዋዳ ኢንቴፊ ኢሲ ኢሲ አሳሰ ማዛሙራ ቃሴ ኢሲ ኢሲ
 አሳሰ ቲሚርቲይ ደሰ፤ ኢሲ ኢሲ አሳሰ ቆንጮንታ ጹራ ሚሻታ
 ቆንጪሲዛ ኢሞታይ ደሰ፤ ሃራ አሳሰ ዱማ ቃላን ሃሳያና ኢሞታይ
 ደሰ፤ ሃራሰ ቃሴ ሄ ቃላ ቢርሺዛ ኢሞታይ ደሰ፤ ሄሲ ሄ ኢሞታይ
 ወሪካ አማኒዛይታ ጎኣናሰ ቤሴሰ።

27 ሃራ ቃላራ ሃሳይዛይ ዲኮ ናምኡ አሰ ዋይኮ ዳሪ ዳሪኮ
 ሄሹ ጌዲዲ ታራን ታራን ዮቲቶ፤ ሃራ አሲ ቃሴ ቢርሾ።

28 ቢርሺዛዳይ ባይንዳ ኣጊኮ ሸቂዳ አሳ ጌዶን ጮኡ ጌዲ
 ባሰ ጸላኔ ጸሳሰ ጸላ ዮቶ።

29 ቲንቢቲ ሃሳያ ኢሞታይ ዲዛ ናቤቲ ናምኣቲ ዋይኮ ሄሻቲ
 ቲንቢቲ ሃሳዬቶ፤ ሃንኮ አሳይ ዮቲቲዳይሳ ሎኤሊ ፓጮ።

30 ኡቲዳ አሳ ጋርሳፊ ኢሳዳይ ኢሲ ሚሺ ቆንጪኮ ኮይር
 ሃሳይዛይሲ ጮኡ ጎ።

31 ኢንቴ ጋርሳፊ ኢሲ ኢሲ አሲ ታማራና ማላኔ ሚኔታና ማላ
 ኢንቴ ወሪካ ታራን ታራን ቲንቢቲ ዮታናሰ ዳንዳዬታ።

32-33 ናቤታ ኣያናይ ናቤታሰ ኣዛዜቴሰ፤ ጋሶይካ ጸሲ ሳሮቴላ
 ጸሳፊ አቲን ዋጫማ ጸሰ ጌደና፤ አማኒዛይታ ዋሳ ኬላ ኡባሶንካ
 ሄሳ ማላ።

34 አማኒዛ አሳይ ጎይኖስ ሽቂዛሶን ማጫሳቲ ጮኡ ጌቶ፤ ሙሴ ዋጋይ ካሴ ጌዳ ማላ ኢስቲ አዛዜቱቶ ኣቲን ሽቆሶን ኢስቲ ሃሳያና ማላ ኢስታስ ኢሜቲቤና።

35 ማጫሳቲ ኤራናስ ኮይዛ ኢሲ ኢሲ ዮኦቲ ዲኮ ባ ኬላን ባ አዚናታ ኦይቹቶ፤ ጋሶይካ ማጫሲ ሽቆሶን ሃሳያይ ዩላቺዛዛ።

36 ጸሳ ቃላይ ኢንቴፌ ኬዚዴ? ዋይኮ ኢንቴኮ ጸላ ጋኪዴ?

37 ኦኒካ ባና፡ «ናቤ» ጊኮ ዋይኮ፡ «ታስ ጸሎ ኣያናፔ ኢሞታይ ዴስ» ጊዛዴይ ዲኮ ሃይሲ ታ ኢንቴስ ጸፊዳይሲ ጎዳ አዛዞ ጊዲዳይሳ ኤሮ።

38 ሃይሳ ኤሮንታ ኣሲ ዲኮ ኢዚ ባ ሁኤስ ኤሬቴና።

39 ሄሳ ጊሻስ ታ አሻቶ! ቡሮ ቲንቢቴ ሃሳያናስ ሎኤሊ ኮዪቴ፤ ዲማ ዲማ ቃላን ሃሳያካ ዲጎፍቴ።

40 ጊዲኮካ ዉሪካ ማራራኔ ዋጋራ ጊዶ።

15

ከርሰቶሳ ዴንዶ

1 ሃኢካ ታ አሻቶ! ታ ኢንቴና ሳባኪን ኢንቴ ኤኪዲ ኢዛን ሚኒ ኤቂዳ ሚሺራቾ ቃላ ሃኢ ቆፍሳና ኮያይስ።

2 ታ ኢንቴስ ሳባኪዳ ቃላ ኢንቴ ሎኤሊ ኦይኪኮ ሄ ሚሺራቾ ቃላን ኢንቴ አታና፤ ሄሳ ማላ ጊዶንታ ኣጊኮ ኢንቴ አማኖይ ሃዳ።

3 ታኒ ታስ ኤኪዳይሳኔ ኡባፌ ኣቋዛይሳ ኢንቴስ ኣላ ኢማዲስ፤ ጌሻ ማጸፋቲ ጊዛይሳ ማላ ከርሰቶሲ ኑ ናጋራ ጊሻስ ሃይቂዴስ።

4 ሞጌቲዴስ፤ ጌሻ ማጸፋታን ጸፊቲዳይሳ ማላ ሄሻንሶ ጋላስ ሃይቆፔ ዴንዲዴስ።

5 ሄሳፌ ካሊዲ ጴጽሮሳስ ቤቲዴስ፤ ቃሴካ ዬሱሳ ካሊዛ ታማኔ ናሞኣታስ ቤቲዴስ።

6 ሄሳፌ ጉዬ ኢቻሹ ጴቴፔ ቦላራ ዲዛ አማኒዛይታስ ኢሲቶ ቤቲዴስ፤ ኢዛ ቤኢዳ ኣሳፔ ዳሪዛ ባጋይ ፓጸ ዴስ፤ ባጋይ ቃሴ ሃይቂዴስ።

7 ሄሳፌ ጉዬ ያቆቤስ ቤቲዴስ፤ ካሊዲካ ኩሜላ ሃዋሬታስ ቤቲዴስ።

8-9 ታኒ ሃዋሬታ ኡባፌ ላፋኔ ካሴ ጾሳ ዋሳ ኬሌ ጎዲዳ ጊሻሰ ሃዋሬ ጌቲታናሰ ቤሶንታዴኮ ሺን አሰ ኡባፌ አወጫያ ሚሳቲዛ ታሰካ ቤቲዴሰ።

10 ጌዶ አቲን ጾሳ ኪያቴላን ሃኢ ታ ሃናናይሳ ሃናዲሰ፤ ታሰካ ኢሜቲዳ ጾሳ ኪያቴሌ ሃዳ ጌዲቤና፤ ታኒ አናፔካ ቦላራ ዳሮ ሚና አላዲሰ። ጌዶ አቲን ሄሳ ኦሌዳይ ታና ጌዶንታ ጾሳ አቶ ኪያቴሌ።

11 ሄሳ ጊሻሰ ታና ጌዲን ኢሰታካ ጌዲን ኑ ወሪካ ሳባኪዛይ ሄሳ፤ አንቴካ አማኒዳይ ሄሳ።

ሃይቂዳ አሳ ዴንላ

12 ኪርሰቶሴ ሃይቆፔ ዴንዲዳይሳ ኑ ታማርሲኮ ሂሰቲን አንቴ ጋርሳፌ ኢሲ ኢሲ አሳቲ ዋኒዲ ሃይቆፔ ዴንዳይ ባ ጊዞ?

13 ሃይቂዳ አሳሰ ዴንላ ዶንታ ጌዲኮ ኪርሰቶሴካ ዴንዲቤና ጉሳካ?

14 ኪርሰቶሴካ ሃይቆፔ ዴንዶንታ ጌዲኮ ኑ ሳባኮሰ ጎኣይ ባ፤ አንቴ አማኖይካ ሃዳ።

15 ሂሳፊካ ቦላራ፤ «ጸሲ ኪርሰቶሳ ሃይቆፔ ዴንላዴሰ» ጌዲ ኑ ማርካቲዳ ማርካይካ ኑና ዋርዶ ጾሳ ማርካታ ኬሲዴሰካ? ሃይቂዳ አሳይ ሃይቆፔ ዴንዶንታ ጌዲኮ ጾሲ ኪርሰቶሳካ ዴንላቤና ጉሳ።

16 ጋሶይካ ሃይቂዳይቲ ዴንዶንታዝ ጌዲኮ ኪርሰቶሴካ ሃይቆፔ ዴንዲቤና።

17 ኪርሰቶሴ ሃይቆፔ ዴንዶንታ ጌዲኮ አንቴ አማኖይ ሃዳ፤ አንቴካ ሃኖ ጋካናሰ አንቴ አንቴ ናጋራራ ዴታ ጉሳ።

18 ሃኖይ ሄሳ ማላ ጌዲኮ ኪርሰቶሳ አማኒዲ ሃይቂዳይቲ ወሪካ ቆይዳ ጉሳ።

19 ኑኒ ኪርሰቶሳን ኡፋይሰ ኦሌዛይ ሃኖ ቢታይ ቦላ ዴሳሰ ጸላ ጌዲኮ ኑ አሳ ኡባፌ ላፋታ።

20 ጌዶ አቲን ኪርሰቶሴ ሃይቂዳይታሰ ኡባሰ ባይራ ጌዲዲ ሃይቆፔ ቱሙ ዴንዲዴሰ።

21 ሃይቆይ ኢሲ አሰ አዳሜ ባጋራ ዪዳ ማላ ሃይቂዳይታ ዴንላ ኪርሰቶሳ ባጋራኮ።

22 ኢሲ ወሪካ አዳሜ ባጋራ ሃይቂዳ ማላ ሄሳካ ኢሲ ወሪካ ኪርሰቶሳ ባጋራ ሃይቆፔ ዴንዳና።

23 ጌዶ አቲን ወሪካ ባ ታራራ ታራራ ዴንዳና፤ ኮይሮ ባይራ ጌዲዳ ኪርሰቶሴ ዴንዲዴሰ፤ ኢዛፔ ካሊዲ ኢዚ ዪዛ ዋዴ ኪርሰቶሳሰ ጌዲዛይቲ ዴንዳና።

24 ሄሳፌ ጉዬ ሃሪቲዛ ዳሬታ ጎዳቲሊኔ ዋለቃማታ ወርሲ ጳይሲዳፔ ጉዬ ካዎታ ጸሳ አዋሰ አሊ ኢሚዛ ዋዴ ሄ ዋዴ ወርሴል ጊዳና።

25 ኢዚ ባ ሞርኬ ወርሲካ ባ ቶሆ ጋርሰ አላና ጋካናሰ ኢዚ ካዎታናሰ ቤሴሰ።

26 ቡሮ ወርሴላን ጸኔቲ ጳያና ሞርኬይ ሃይቆ።

27 «ጸሲ ወርሲካ ኢዛ ጎዳቲላፌ ጋርሳን ዋሊዴሰ» ጊዛዚ ጌሻ ማጻፋን ጸፊቲዴሰ፤ ጊዶ አቲን፥ «ወሪካ ኢዛ ጎዳቲላ ጋርሳን ጊዲዴሰ» ጊሺን ወሪካ ኢዛ ጎዳቲላ ጋርሳን ኦሊዳ ጸሳ አዋ ጉጃና።

28 ወሪካ ኢዛሰ ሃሪቲዳይሳፌ ጉዬ ጸሲ ኡባፌ ቦላ ጊዳና ማላ ጸሳ ናይ ቃሴ ኡባ ባሰ ሃሪሲዳይሳሰ ጸሳ አዋሰ ሃሪታና።

29 ሃይቆፔ ዴንሊ ዶንታ ኣጊኮ ሂሰቲን ሃይቁዳ አሳ ጊሻሰ ጊዲ ጸማቄቲዛ ኡባሰ ጎኣይ ኣዜ? ሃይቁዳይቲ ሙሌካ ዴንዶንታ ጊዲኮ ሂሰቲን አሳይ ኢሰታ ጊሻሰ ኣዛሰ ጸማቄቲዜ?

30 ኑ ቃሴ ኡባ ዋዴ ኢታ ሜቶሰ ኣጲ ኢሚቲዛይ ኣዛሴ?

31 ታ ኢሻቶ! ሃቶ ሃቶ ሃይቆይ ታናራ ጋጌሰ፤ ሄሳካ ኑ ጎዳ ዬሱሰ ኪርሰቶሳ ጋሶን ኢንቲ ቦላ ዲዛ ኣማኔቲል ታ ኢንቲሰ ቆንጪሳይሰ።

32 ታኒ ኤፌሶኒን ዶኣ ሚሳቲዛ አሳታራ ባጾቲዳይሲ አሲ ቤያና ማላ ጸላላ ጊዲኮ ታሰ ኢዛን ኣዛ ዋዴይ ዲዜ? ሃይቁዳይታሰ ዴንሊ ዶንታ ኣጊኮ፥ «ኑ ዋንቶ ሃይቃና ጊሻሰ ኣኔ ሞሰ፤ ኣኔ ኡዮሰ» ጊዛይታ ማላ ኩኒካ ኢሰታ ማላ ጊዶሰ።

33 ኢንቲ ባሌቶፍቲ! ኢታ ላጌቲሊ ሎኦ ኣማሌራ ዲዛይታ ሞሬሰ።

34 ዋዚናማ ጊዲቲ፤ ናጋራ ኦሶፍቲ፤ ጸሰ ኤሮንታይቲ ኢሲ ኢሲ አሳቲ ኢንቲ ጋርሳን ዲዛ ጊሻሰ ታ ሄሳ ኢንቲና ዬላቻናሰ ጋይሰ።

ሃይቆፔ ዴንዳና አሳቲል

35 «ሃይቁዳይቲ ዋኒ ዴንዳኔ? ኣይ ማላ አሾራ ዴንዳኔ?» ጊዛዴይ ዳና ዴንዳይሰ።

36 ኒዮ ኤያዘ! ኔ ዜሪዛ ዜሬላይ ሃይቆንታ ዲሼ ጫሬና።

37 ኔኒ ዜሪዛ ካላ ሞዴያ ጊሰቲ ዋይኮ ሃራ ካላ ኣይፌ ጊዲኮካ ጉዬፔ ኔ ኤካናራ ሃኢ ኔ ዜሮሮ ጊዲኩ።

38 ጸሲ ቃሴ ባ ኮዬዳ ማላ ሄ ዜሬላሰ ኢዛ ማላ ሜጶ ኢሚሰ፤ ዜሬላ ቆሞታሰ ኢሳሰ ኢሳሰ ኢዛ ሚሳቲዛ አሳቲል ኢሚሰ።

39 አሾይ ወሪካ ኢሲ ማላ ጊዳና፤ አሳ አሾይ ኢሳ ጊዳሺን ማሄ አሾይ ቃሴ ሃራ፤ ካፎ አሾይ ሃራ፤ ሞሌ አሾይካ ሃራ ቆሞ።

40 ሄሳ ማላካ ሳሎን ዲዛይታሰካ ኢስታ ሚሳቲዛ ሜዶይ ዳሰ፤ ቢታ ቦላ ዲዛይታሰካ ኢስታ ሚሳቲዛ ሜዶይ ዳሰ፤ ጊዶ አቲን ሳሎይታ ቦንቾይ ኢሲ ማላ፤ ቢታ ቦላ ዲዛይታ ሜዶ ቦንቾይካ ዲማ።

41 አርሼ ቦንቾይ ኢሲኖ፤ ጊዶ አቲን አገና ቦንቾይ ቃሴ ዲማ፤ ጸለንቲታ ቦንቾይካ ሃራ፤ ኢሲ ጸለንቲ ቦንቾይ ሃራ ጸለንቲ ቦንቾፌ ዲማቲሰ።

42 ሃይቂዳ አሳ ዳንሊካ ሄሳ ማላ፤ ዋቂዛ ሜዶይ ዜሬቲን ዋቆንታ ሜዶይ ዳንዳና።

43 ካወሻቲላን ዜሬታና ሺን ቦንቾን ዳንዳና፤ ዳቡርሳን ዜሬታና ሺን ዋልቃማ ጊዲዲ ዳንዳና።

44 ሜዴቲላ አሳቲሊ ዜሬታና ሺን አያና አሳቲሊ ዳንዳና፤ ሜዴቲላ አሳቲሊ ዲኮ ቃሴካ አያና አሳቲሊካ ዳሰ።

45 ሄሳ ጊሻሰ፡ «ኮይሮ አሰ አዳሜይ ዳኦይ ዲዛ ሜዴቲላ ጊዲዳሰ» ጌቲቲ ጌሻ ማጻፋን ጸፊቲዳሰ። ናምአንሉ አዳሜ ጊዲዳ ኪርሰቶሲ ጊዲኮ አሳሰ ዳኦ አሚዛ አያና።

46 ጊዶ አቲን ኮይሮ ዪዳይ አያናይሳ ጊዶንታ ሜዴቲላይሳ፤ አያናይሲ ቃሴ ጉዬፔ ዪዳይሳ።

47 ኮይሮ ዪዳ አዳሜይ ቢታፌ ሜዴቲዳ ጊሻሰ ኢዚ ቢታፌ። ናምአንሉ ዪዳይሲ ሳሎፔ።

48 ቢታፌ ጊዲዳይቲ ኢስቲ ቢታፌ ሜዴቲዳይሳ ማላ። ሳሎፔ ጊዲዳይቲ ሳሎፔ ዪዳይሳ ማላ።

49 ኑኒ ቢታ አሳ ሜዳ ማይኦይሳሉካ ሳሎይሳ ሜዳካ ማይኦና።

50 ታ ኢሻቶ! ታ ሃይሳ ኢንቲሰ ዮታይሰ አሾይኔ ሱሊ ጸሳ ካዋቲላ ላቲቲና፤ ዳያናይሲ ዳዮንታይሳ ላቲና።

51 አኔ ታ ኢንቲሰ ኢሲ ጹራ ዮኑ ዮታይሰ፤ ኑኒ ወሪካ ሃይቆኮ፤ ጊዶ አቲን ኑ ወሪካ ላሜታና።

52 ሄሲካ ሃናናይ ኑ ቆፖንታ ዲሺን ወርሱላ ጹሩምባይ ፑኔቲዛ ዋዴ ቀጲዳ አይፌይ ጴሊዛ ማላ ኢሲቶ ሃናና፤ ጹሩምባይ ፑኔታና፤ ሃይቂዳ አሳይ ዋቆንታይታ ጊዲዲ ዳንዳና፤ ኑኒካ ላሜታና።

53 ዳይዛይሲ ዳዮንታይሳ ማይኦናሰ፡ ሃይቂዛይ ሃይቆንታይሳ ማይኦናሰ ቤሴሰ።

54 ጳይዛይ ጳዮንታዝ፥ ሃይቂዛይ ሃይቆንታዝ ማይኢዛ ዋዳ፥
«ሃይቆይ ጸኔቲ ሚቴቲዳስ» ጌቴቲ ካሴ ጌሻ ማጻፋን ጸፊቲዳ
ቃላይ ፖሌታና።

55 ሃሳሶካ፡

«ሃይቆ! ካሴ ኔ ጸኖይ ኣዋን ዲዜ?

ሃይቆ! ኔ ኢዛራ ጫዲዛ ዪሻይ

ኣዋን ዲዜ?»

ጌቴቲ ጸፊቲዳስ።

56 ሃይቆይ ኢዛራ ዱኪዛ ዋልቃይ ናጋራ፤ ናጋራ ዋልቃይ ዋጋ።

57 ጊዶ ኣቲን ጎዳ ዬሱስ ኪርሰቶሳ ባጋራ ኩስ ጸኖ ኢሚዛ ጸሓስ
ጋላታይ ጊዶ።

58 ሃሳ ጊሻስ ታ ሲቆ ኢሻቶ! ሚኒ ኤቂቴ፤ ኣይ ሚሻንካ ያርክ
ያርኮፍቴ፤ ጎዳ ኦሶስ ኢንቴ ዳቡርዛ ዳቡርሳይ ሃዳ ጊዶንታይሳ
ኤሪዲ ኡባ ዋዳ ፓጩይ ባይንዳ ጎዳስ ኦፋናስ ሚኔቲቴ።

16

ዩሩሳላሜን ኣማኖ ጋሶን ዋዩቲዛይታስ ሚሻ ኬሶ

1 ሃኢ ቃሴ ኣማኒዛይታስ ሚሻ ኬሶ ጊሻስ ጋላቲያን ዲዛ ዋሳ
ኬላታስ ታኒ ኢሚዳ ኣዛዘ ማላ ኢንቴካ ኦሒቴ።

2 ሚሻይ ኬዛናይ ቡሮ ታ ሄ ቢን ጊዶንታ ማላ ኢንቴፌ ኢሲ
ኢሲ ኣሲ ባስ ዲዛ ማላ ሳሚንታን ሳሚንታን ዋጋ ጋላስ ኬሲ
ዋሶ።

3 ታ ሄ ቢዛ ዋዳ ኢንቴ ዶሪዳ ኣሳታስ ታ ሞይዞ ዳብዳቤ ጸፋ
ኢማዳ፥ ኢሰቲ ኢንቴ ኢሚዳ ኢሞታ ዩሩሳላሜ ጋፋና ማላ ሃፔ ታ
ኪታና።

4 ታ ኢሰታራ ባናስ ኮሺዛዝ ጊዲኮ ታናራ ባንዴቴስ።

ኦጌ ባናስ ጸጧሎሳ ቆፋ

5 ታኒ ባሽ ማቂዶኒያራ ኣቆ ቡሲ ታስ ኣቶንታ ጊሻስ ታ
ማቂዶኒያ ጋካዳ ሄራ ኢንቴኮ ባና።

6 ታ ኣዋካ ቢሺን ታና ኦጌይ ዋዩሶንታ ማላ ኢንቴ ታና ማዳና
ማላ ባሽ ታ ኢንቴ ኣቻን ጋሞኦንታ ኣጊኬ። ኦኔ ኤሪዛይ ባልጎይ
ኣቆና ጋካናስ ታ ኢንቴ ኣቻን ባልጎዛ ኣሶንታ ዋያ ኣጋና።

7 ታ ኢንቴ አቻን ዳሮ ዋዴ ጋምእናሰ ኮይዛ ጊሻሰ ኢንቴና ጮ ኦጌራ እቋ ባሼ ቤያናሰ ኮይኬ፤ ጎዳ ሼኔ ጊዲኮ ኢንቴ አቻን አዲሳ ዋዴ ጋምእናሰ ኮያይሰ።

8 ጊዶ አቲን ጳንጼቆሰቴ ጌቴቴዛ ባኣሌ ጋላሰ ጋካናሰ ታ ኤፌሶኔን ጋምእና።

9 ታ ሄን ጋምእና ጋሶይካ ታሰ ሄን ጊታ ኦሶ ፔንጌይ ዶዬቴዴሰ ሺን ታናራ ኤቁቴዛይቲ ዳሮቲ ዴቴሰ።

10 ጸምቶሴ ኢንቴኮ ቢኮ ኢዚ ታ ማላ ጎዳ ኦሳንቻ ጊዲዳ ጊሻሰ ኢዚ ባቦይ ባይንዳ ዳና ማላ ኢንቴ ኢዛ ማዲቴ።

11 ሄሳ ጊሻሰ ኦኒካ ኢዛ ካቶፖ፤ ኢዚ ታኮ ሳሮን ሲማና ማላ ኢንቴ ኢዛ ማዲቴ፤ ኦኒካ ሃራ አማኒዛይታራ ኢዛ ዩሳ ናጎን ዶሰ።

12 ኑ ኢሻ እጲሎሲ ሃራ አማኒዛይታራ ኢንቴኮ ባና ማላ ኬሃ ዋሳዲሰ ሺን ኢዚ ቃሴ ሃኢ ኢንቴኮ ባናሰ ኮዪቤና፤ ጊዶ አቲን ባና ኦጌይ ኢዛሰ ጊጊሺን ኢዚ ኢንቴኮ ባና።

ወርሴላ ዞሬኔ ሳሮካ

13 ቤጌቲ! አማኖን ሚኒ ኤቁቴ፤ ሚኒቴ፤ ጎቤቴ።

14 ኢንቴ ኦላዛዝ ወርሴካ ሲቆን ኦላቴ።

15 ታ አሻቶ! አካያ ቤታን ኮይሮ አማኒዳይ ኢሰቴፋኖሴሶ አሳ ጊዲዳይሳኔ አማኒዛ አሳ ማዳናሰ ኢሰቴ ባና ኦላ ኢሚዳይሳ ኢንቴካ ኤሬታ።

16 ኢሰታ ሚሳቴዛ አሳታሲኔ ኢሰታራ ኢሲፌ ዳቡርዛ አሳታሰ ኡባሰ አዛዜታና ማላ ታ ኢንቴና ዋሳይሰ።

17 ኢሰቴፋኖሴ፤ ፌርዶናጾሲኔ አካይቆሲ ዩዳ ጊሻሰ ታ ዳሮ ኡፋዬታይሰ፤ ጋሶይካ ኢንቴ ሃን ታናራ ዶንታ ጊሻሰ ኢሰቴ ታሰ ፓጪዛዝ ወርሴ ኩንላዳ።

18 ታ ዋዚናኔ ኢንቴ ዋዚና ወርሴ ሸምፒሲዳ፤ ሄሳ ጊሻሰ ሄሳንታ ማላ አሳታ ሙሌ ባሎፒቴ።

19 ኢሲያ ቤታን ዲዛ ዋሳ ኬፋቲ ኢንቴና ሳሮ ጌቴሰ፤ አቁላይኔ ጸርሲቁላይካ ኢሰታ ሶን ሺቂዛ አማኒዛ አሳይ ጎዳ ሱንላን ቦንቾ ሳሮታ ኢንቴሰ ሺሼቴሰ።

20 ሃን አማኒዛይቲ ወሪካ ኢንቴና ሳሮ ጌቴሰ፤ ኢንቴ ኢንቴ ጊዶን ኢሶይ ኢሳራ ሲቆ ዩሬቴሰ ዩሬቴቴ።

21 ሃይሳ ሳሮካ ታ ኩሼራ ጳፊዳይ ታና ጳዉሎሳ።

22 ጎዳ ዶሶንታዴይ ዲኮ ኢዚ ቃንጌቲዳዴ ጊዶ! ጎዶ ሃ ያ!

23 ጎዳ ዩሱሳ ከያቴላ አንቴናራ ጊደ።

24 ታ ሲቆይ ጎዳ ዩሱሰ ከርሰቶሳ ባጋራ አንቴሰ ኡባሰ ጊደ!
አሚን።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b